

備盧文存

王安勿



備廬文存敘

兆備先生夙治理學以其餘力爲文不規規於字句間蓋無意於求工積四十年稿幾盈尺一旦悉舉以授毓黻且告之曰吾將舉斯稿與人以共見子其爲我定去取不必以多爲尙毓黻受命而退謹爲選錄七十餘篇釐爲四卷將付諸手民印行之並爲之敘曰先生之爲人光明洞達無適無莫文亦一如其人譬之泉源滔滔汨汨層出不窮又如長江大河一瀉千里乍觀之不易窺其涯涘非可一端盡也方其得意疾書下筆萬言驅使書卷奔湊腕底匠石運斤不足以喻若其精言奧義切理饜心著墨不多造語矜慎亦往往有之蓋皆因題成文卷舒如意一二語不患其少千萬

言不覺其多所謂文章之能事大略盡於是矣夫古人之爲文非有意於求工也而其工莫比焉大抵鬱久而後發迫之而始出如屈子之行吟子長之發憤意在筆先文成法立未有規規於字句間壹意求工於文而能卓然成家者也然則先生之文之可貴及其所以爲大夫豈不以是歟噫今世之談學者多矣或流於空疏或涉於破碎或拘墟乎舊聞或馳騫於新說本斯意以爲文皆不免流於一偏而難望其行遠也夫惟篤於性情根柢理學以仁義爲貞幹以詩書爲澤藪然後其文博大昌明可歌可誦足以驚風雨而泣鬼神必知此義始可以論先生之文彼姝姝守一家之言專求工於字句者不足以喻乎此也先生自言頗留意鄉邦文獻

表章耆賢尤不遺餘力篇中於此三致意焉愚謂先生以身繫一方安危垂三十年欲考近頃之政治得失風俗醇薄皆可於其文中窺見消息留心文獻表章耆賢不過其一端耳世多知先生者其以鄙言爲然乎否也先生所存之文旣不以多爲貴爰本斯旨選錄如次名曰文存以示不止於此若夫世人之讀先生文者以爲未盡更博而求之雖零篇斷楮片言隻字彌覺其可貴而鄭重蒐輯之於以患其少而不病其多此則異時必至之勢非所以語於今日也先生之詩並命黃子松客選錄名曰詩存與此編同付手民謹爲敘其大旨弁爲篇首俾讀者有考焉甲戌八月同邑後學金毓黻謹敘

備廬文存目錄

卷一

心箴

壬辰

先妣楊太孺人壙記

甲午

祭曲賡三文

乙未

戴樸齋先生小傳

以下丁酉

無恆箴

與侯汝康書

戊戌

清太學生蘇西園先生墓誌銘

以下辛丑

蘇君薈臣原配張氏墓誌銘

寄高華廷山左書 以下壬寅

自箴

靜遠齋箴

以下癸卯

清贈文林郎白公又銘墓誌銘

與張仙舫書

與鹿賓國孝廉書

以下甲辰

劉敬亭太守傳跋

題仙舫畫石贈王者賓

以下乙巳

自警箴

自厲箴

以下丙午

祭陳百川文

題高鈞閣小照

再題鈞閣小照

與某君書

祭張筱圃提學使文

以下戊申

贈王岷源座右銘

送姪女桂瑄入省城節烈祠文

以下庚戌

重刊原人跋

自箴

以下甲寅

與孫鼎臣書

重印盛京通志跋

卷二

覆陳劍譚函

丙辰

覆康南海先生書

戊午

謝耿旅長惠酒牋

己未

清授中憲大夫候補知府鄉諡剛靖徐公墓誌銘

以下壬戌

祭徐剛靖公文

學敬齋遺稿序

甲子

宋星五遺著序

以下乙丑

陳季芳先生重編百家姓序

呂邨鋤園圖序

丙寅

馬氏五誌書後

以下丁卯

祭渾源田子琮先生文

內務部總長渾源田君墓誌銘

公祭東三省會館鄉賢祠設位諸公文

馬氏重興記識語

祭趙次珊先生文

祭王岷源省長文

卷三

繆蘭皋先生詩序

以下戊辰

祭東三省會館鄉賢祠續行設位文

遼東三家詩鈔序

祭洪未丹先生文 己巳

題世仁甫學士遺像 以下庚午

告无補老人文

跋恆諺記

跋課己錄

徐行清制軍故里鐫石記

祭王聘卿先生文

李忠節公奏議跋

李子棟瑄珥琪館詩序

方舟山人傳 以下辛未

張仙舫像贊

祭張仙舫文

重刊常理齋觀察殉節錄序

卷四

陳挺生愛廬印集序 以下壬申

遼陽韋君墓誌銘

陳慈首孝廉誄辭

祭于雲章文

吳雨生先生贊

以下癸酉

過西八里莊祭李祝三墓文

陳季芳先生葛溪詩鈔序

蘇君薈岑壽序

續龍文鞭影序

重印仙樵詩鈔弁言

重印西岡詩草弁言

安君波岑墓表

先考敬廷府君墓表

袁氏三貞女碑記

甲戌

目錄終

備廬文存卷之一

遼陽袁金鑑潔珊

心箴

壬辰

吾有此身時宜自警百歲雖遙積於俄頃亞聖之言發人深省求其放心勿使馳騁每仰昔賢操持嚴整我雖愚柔心常耿耿誓自今茲朋從力屏處世以敬讀書以靜求慊戒欺勿慚衾影譬如爲山譬如掘井無怠無荒慎修思永以自早年以至晚景謹稟此心不移於境寶守箴言著鞭力猛

先妣楊太孺人壙記

甲午

先妣太孺人楊氏盛京漢軍正黃旗人世居遼陽東北犇牛屯爲

州大姓考諱斌業農有隱德娶同邑張氏以道光十年七月二十
八日辰時生太孺人年二十一歸吾父敬庭公逮事舅姑恂謹篤
敬多爲人所難能以子金鎧舉優行廩膳生員例封孺人生平仁
厚淑靜柔順安貞人不見其有疾言遠色光緒二十年正月初九
日辰時卒年六十有五生男三長金銘持家政次金鏞禮部領催
次金鎧補博士弟子員食餼舉優行鄉薦一女金蘭幼殤孫男四
慶溥業儒慶潤慶濂慶濟皆幼孫女八人長適劉三字高餘皆待
字以卒年二月丙午承吾父命葬於北原祖塋金銘等哀號隕絕
謹記梗概昊天罔極嗚呼痛哉

祭曲賡三文

乙未

維光緒二十有一年歲次乙未七月二十八日袁金鎧謹具清酌
時羞致祭於曲君賡三之墓嗚呼賡三獨不能少待以相與有成
耶壬辰春識君藩垣仰見氣宇沖和舉止凝重知爲學問中人欣
然企慕然尙未知君之深也既定交以文藝相切劘筆削拙作不
爲唐讚彼時獲益於君已不淺矣癸巳赴秋闈水同舟陸同車朝
夕不相離論文之外研講身心性命窺君動靜語默間操守嚴密
肅然自斂於是知君始深君亦以吾爲可教切指病痛不稍寬假
嘗謂吾曰爲學之道首戒無恆而矜氣尤宜速化噫君爲斯言其
知吾深矣望吾厚矣敢不勉歟且人雖好善無以激發則不動而
激發之資仰賴於朋友者居多今人讀書論世亦知朋友有勸善

規過之義而志趣卑污識見淺陋不能相期以遠大求所爲責備之殷屬望之切如君之於吾蓋百不獲一焉使天假君以年造詣當益純粹而吾得日聞讜論不自菲薄或可稍盡爲人之道以無忝於所生嗚呼詎意君棄吾而遽歿耶去年春與君約同赴京兆試七月朔晤蓋臣始知君遘疾來省就醫且攜考具謂病愈啓程吾以愆遽未暇俟君抵京爲投卷場前日盼君至八月六七日間猶冀君之或至初不料君於去年今日已作古人也嗚呼痛哉君生平戒欺求慊從無過舉存順歿寧可爲君信獨吾於君誼兼師友情同骨肉死未憑其棺窆未臨其穴含痛莫伸衷心疚歎今逢忌辰遠來拜奠且搜檢遺文兼詢君妻孥近況九泉之下或當少

慰乎尙享

戴樸齋先生小傳

丁酉

先生名格字樸齋盛京內務府旗人家綦貧遊學四方酷好宋五子書怡然自樂不以境遇累其心日勸人爲善娓娓不倦聞有講理學者嘗徒步訪於數百里外因馬君子亨言來訪予並以北谿字義見贈與之談理翕然無間先生謂予頓悟實有宿根惟尙須於敬字作工夫次日別去其後余獲受益於呂星吾孝廉先生介紹之力也關外三省素少名儒邇來漸有講求理學者

世仁甫王味三方子

餘戴樸齋呂星吾

尙冀有人焉躬行實踐力爲倡率勉紹先賢誘掖後進

庶幾通儒蔚起不振斯文不禁跂予望之

無恆箴

丁酉

人而無恆爲巫醫尙不可余旣已知之而未有以去其惰人奚爲道奚荷誓自今茲心精力果庶幾天之不終棄我

與侯汝康書

戊戌

予以易言之故致書執事懇賜督責乃荷賜書謂吾鄉前輩未嘗有以講學自任者君今欲挽末俗而使之振非大聲疾呼安能發聾震聵蓋引學者以入道非如斯則不易爲力也噫如君之言直以昌明正學望吾矣意非不厚然撫衷自問毫無如人處及此壯歲埋頭闇修尙恐不逮古人萬一況心浮氣躁大言不慚德不加修業不加進直待四五十碌碌無聞徒貽譏笑雖悔庸可及耶

願於今後力持一默字勉守一專字維君其鞭策之

清太學生蘇西園先生墓誌銘

辛丑

先生諱維翰字西園姓蘇氏先世直隸樂亭人太高祖登科始遷奉天著籍承德父明泰識逾恆流擇業不苟蘇氏之昌實啓於是娶於胡生子四先生其長也早歲業儒姿性穎異所爲詩文書法卓然可觀覽初應縣府試即有聲年二十三遭父喪時先生方從師讀銳志進取而內顧大父羸病諸弟孱弱家計需人始棄舉子業嘗入貲爲太學生志在觀光終以家務羈縻不獲重理舊業與人談及引爲深憾夙嗜讀終身弗倦於書無不讀尤長於史自漢唐以來政治得失人材純駁常往復論辨時杼卓見而於治家之

際遇事接物每步武古人陰取則焉是非口耳之學所能企矣性深沈不多言聲低而和語語經審度然後發嘗以訟事被誣州牧某挾持之以措詞得體獲免里中僉壬輩瞰先生族孤每思藉端侵侮而終不得逞蓋先生於人情事故熟復於胸故動中機宜不留罅隙家素豐厚自先生持家政產日益教子弟以謙謹延師課讀不求速化吾鄉名士如張子仙舫高子華廷李子祝三皆用子薦相繼主西席先生均禮重之門內食指數十秩然有序恩義交盡吾鄉手足共爨家法著稱遐邇如先生者未易一二數也先生季女以光緒己丑夏歸鎧時鎧弱冠遊庠先生慮年少氣溢每趨侍左右嘗旁徵遠引顯詔微諭所以誘掖而期望之者至深且厚

愧鎧未能悉如先生教然追憶十餘年來亦嘗竊有所獲庚子閏
八月俄人來襄平陷先生率家人輩遷徙流離備經險患坐是宿
疾增劇以九月三日卒於二道溝李氏姊家年六十有一配王孺
人生子三萃亨業儒娶張氏以俄人之亂思患預防仰藥而卒豫
亨娶王氏晉亨業儒娶李氏女三長適李殿榮次適白氏先卒婿
白毓清癸巳恩科鄉試挑取膳錄候選府經歷次適袁金鎧優行
廩膳生孫三正中正言正方以翌年十月二日葬先生於南原祖
阡鎧維先生學問襟抱迥越常人幸叨子壻之列獲知獨悉儻令
湮沒弗彰有不得辭其責者爰敘次生平綴之以銘敬遺先生諸

子俾刻諸墓道銘曰

抱用世之具屏處乃在草萊操人倫之鑒屬望乃在鴛鴦嗚呼先生於予未獲覩厥將來予於先生謹書此以誌餘哀

蘇君薈臣原配張氏墓誌銘

辛丑

今天子在位之二十六年拳匪肇釁中外構兵閏八月五日俄人陷襄平遂入陪京維時官吏有守土之責者奔竄恐後僉咨一死猶不若婦人女子見逼強暴尙能慷慨捐生義不苟活顧未有思患預防獨爲其難者有之自蘇張氏始氏余妻弟薈臣之配也以閏八月六日隨其家人避地而東時聞土寇瞰其殷富思魚肉焉計莫如歸氏大懼其家近通衢而俄兵之逸出者時以淫暴聞也比至家遂仰藥死嗚呼烈哉孔子謂中庸不可能與其爲愚不肖

之不及寧爲賢哲者之過夫淫暴之禍豈必適逢其厄哉思患豫防獨爲其難有死而不顧者蓋不敢徼倖於不可知之數期於吾心自操勝算焉耳氏爲處士級三之女年十七歸曾臣共於婦職鉅細必懃事翁姑承顏順志無幾微倦怠嘗侍姑疾隆冬五更起作茶湯日日無間性夙剛烈遇孩提不稍寬假而於翁姑前婉體其意未嘗一遭訶譴予往還岳家十餘年初見氏如是久之無不如是每歎巾幗中如是之必敬必戒者吾生平未之見也可謂賢矣況值危亂尤能卓然自立也乎氏生於同治十一年十二月十七日卒於光緒二十六年閏八月十九日年二十有九子二正中正方暫厝未葬予爲先期銘之愧夫世之可以死而不死者且以

塞薈臣之悲薈臣名萃亨敦品好古予素所敬慕者也銘曰
非沾沾以立異亦不碌碌以苟同行雖過矣烏可以不讀書之女
子而刻繩以中庸世之吝其死者夥矣平日何嘗不談孝而談忠
愍拳民之肇釁實自我而興戎其有不幸而爲強暴所辱者亦不
必慘禍之盡逢茲獨嚴斯世之穢亂而脫然早避其凶高自位置
孰繼其蹤況婦職之克盡更婉婉之聽從勒諸貞石永鎮幽宮庶
幾播此卓行以昭示於無窮

余爲請於政府後
蒙褒揚賜額旌門

寄高華廷山左書

壬寅

有入宦途而故作窮態者是懷詐也懷詐者固可鄙矣若我本窮
人而飲食服御一切讌會皆力矯寒儉是窮而故作不窮也其心

亦不可問君本寒士今在官場應淡泊自甘矯當世奢華無味之
習而守儉以養廉之訓斷不至如前者所云云蓋可知也人生之
大節義利生死四字盡之而辭受取與之際君子尤兢兢焉語云
受恩之地難爲人施我者縱不望報予心能安乎況不清其源不
惟我所願受者受之即我素昔所不屑受者而亦受之矣其消息
何如又烏可不謹哉在東氣象未能目覩不敢臆測竊以爲此後
宜腳踏實地反樸歸真居易以俟命乃不愧爲君子若志高氣揚
惟知前程萬里恨不一蹴而致恐目前咫尺皆足致蹉跌也即令
微倖而至亦難免行險之譏孔子曰不知命無以爲君子也此之
謂也張清恪公正誼堂全集兼道德經濟文章三者而有之時常

展讀必能超拔流俗若徒涉獵時務諸書每足長人客氣此中消息至微至顯非深心人烏足以知之

自箴

壬寅

不必復有所箴不必復有所銘但將爾之所自期待與爾之所責望於人者胥返躬而即其實焉亦可無忝於所生不然悠悠忽忽三十已過四十不遠其見惡也必矣更何以爲情

靜遠齋箴

癸卯

志學之初騁懷文苑不克鵬搏敢曰命蹇世路難行九折之阪賴濟時材挽回衰晚四海無歸何處肥遯濟濟簪纓孰司補袞柁險棋危安放要穩旋轉之樞寸衷爲本好善則優自滿則損遐哉葛

公靜以致遠我儀其人不忘每飯以名吾齋深其繾綣日月奔馳
去而弗返道貴有恆功宜自返以奮以興勿息勿偃龍臥終飛天
際蜒蜿掃厥煙塵開茲混沌家國之基維新是墾何日愜心慰子
誠悃

清贈文林郎白公又銘墓誌銘

癸卯

光緒二十六年拳匪肇釁中外失和俄人來遼陽陷維時土寇縱
橫一夕數驚官吏遁逃士民駭散尋地覓生踵相接也而吾遼陽
半礪山白公又銘諱日新者獨大懼時局滄桑豐鎬神區將淪異
域於是痛心蒿目慘不欲生介然獨斷仰藥而死閱三載公弟附
貢生日章姪國子生介清子國史館漢謄錄候選府經歷毓清以

公之卒時際擾攘送終之儀缺然未備乃於後三年八月忌日通
赴戚友敬潔粢盛奉主入祠以妥公靈又以墓誌之文屬諸金鑑
辭之不獲爰按公生平大略而綴詞以銘之銘曰

公之爲人卓犖異常予生雖晚尙悉其詳幼讀三載去而習商曾
不數月浩然返鄉長者訶譴壯氣昂藏躬勤操作拮据弗遑同治
年內增記蹶僵資本虧折東夥惶惶賴公興復勢熾而昌雲蒸霞
蔚局面堂皇積年甕土湧溢酒漿樹榮自本家道日康錢帛絡繹
罄無私囊赫赫有作尤在燒行光緒初元糟工猖狂犯上作亂踴
躍跳踉經公控訴痛予懲創弭耳帖服歸我主張酒班錯雜蠹耗
穀糧公復稟請三班定章時或酌減留備凶荒督轅奏准永立紀

綱國賦民食兩無所妨厥功甚偉奕禩不忘心涵春煦面懷秋霜
排解紛難苦口熱腸動稱古人踽踽涼涼名臣奏牘羅列座旁侯
官之林椒山之楊往復百讀聲出琅琅誦習規仿日就月將下筆
泉湧藻采高翔兄一弟兩花荆棘棠姪輩森立蘭玉芬芳往歲析
產意美法良舊均四宅新按諸郎大公無我遐邇稱揚孺人夏氏
先公而亡溫恭淑慎左右贊襄毓清伯子業肄青緗童試屢絀未
遂遊庠公爲納監俾赴鄉場謄錄被選史館觀光佐清仲子英爽
剛強承公舊業運籌有方諸孫耕讀金玉其相女適袁氏鳳鳴鏘
鏘期逾花甲故里相羊肯爲他人終作嫁裳天胡此厄俄陷遼陽
土寇蠡擁徧擾豺狼乘勢劫虜民衆蒼黃公觀此狀黯然神傷一

呷之藥泉路迴航古稀遙阻壽斬陵岡受形之始海宇休祥畢命之日滿目櫂槍卽世三載特薦馨香感慨勒石以詔茫茫

與張仙舫書

癸卯

接誦來函引咎自責詞氣深摯乾惕日深具見厚自期待之意敬佩奚似至以弟之未能刻相責備爲憾弟不肖方以躬自薄而厚責於人致至交如高子華廷侯子汝康李子祝三皆望而畏我有漸相疏遠之勢度諸子之心未必不曰袁子好刻責人噫弟之過也今後將痛改矣不謂兄意恰與諸子相反而竟以未能刻相責備憾弟也能如是孰不樂告之以過矧爲至親且厚性命相依之人耶夫弟之於兄也自以爲知無不言言無不盡矣而兄猶有憾

以兄之憾爲是耶兄苟有過弟知之固必告之矣以兄之憾爲非耶豈無應刻相責備之處而從前未敢徑陳者是兄之憾不得謂非是也抑弟猶有說焉人苦不自知一語爲恆人言之耳苟道理洞達方將知人論世上下千古顧於己之病痛而茫然坐雲霧中耶張橫渠先生謂學者當以心爲嚴師祈兄刻自搜尋果有自知之明否耶如搜尋未徧弟當不顧躬自薄而厚責於人之謂爲吾兄冒昧陳之矣

與鹿賓國孝廉書

甲辰

我輩立會辦賊必先自治我心使光明正大毫不苟且然後得賊而置之法即賊亦必服我否則拖泥帶水心地先不乾淨其與賊

也賢不肖之相去有幾何耶彼賊人具有知識欲以掛其口而服其心恐亦必不可得之數矣立會辦賊看似懷然難犯純是義字精神其實須以至誠惻怛之心與爲固結不惟良善之士宜予保全即賊匪一面亦宜哀矜之不已儻有可原必與以自新之路誠以民胞物與之懷言之彼亦吾同胞也上失其道教化替而風俗偷加以時勢變亂不克自主故誤入迷途中非人性之果惡也觀兄之所爲極似熱腸人非忽然於斯世斯民之故者然從旁微窺又似頗以時勢衰微仕途蕪雜不愜於心而概以不屑視之此不可也保種保國之心至今日尤亟亟國朝列祖列宗功德在民去周之文武成康不遠即云王綱已墜猶可如東周君之守府延殘

祚數百年我輩身爲臣子皆有關係之責謂宜高自期待大之則旋乾轉坤曾左諸賢豈其絕迹小之則一官一邑於人必有所濟山林泉石之想不宜作也或於今日時勢以爲無望太息咨嗟而欲去之弟於今日時勢亦未嘗不太息咨嗟而每思得聖賢豪傑數十輩而相與挽之其妄也可笑其癡也可憐所謂多見不知量者其弟之謂乎時賢新說談理不無偏畸其發揮危亡之慘競爭之理亦時有透闢處不宜概斥爲異端屏而不視且即果爲異端吾亦必發奸摘伏洞其癥結之所在乃可以大聲疾呼辭而闕之也

劉敬亭太守傳跋

甲辰

郭主事普涵曾著敬亭太守傳備載守太平府殉難顛末意不忍其湮沒也太守諱作肅姓劉氏奉天承德縣南白塔堡人由舉人官學教習出知粵西天河縣事升寧明州知州咸豐三年以守城功加知府銜六年五月署太平府事賊酋吳凌雲以其黨來攻屢卻之十年八月城陷作絕命詩自縊死詩曰父教我盡心君教我盡力心力已俱竭捐軀寧自惜忍辱而偷生何以立天地一死報君親此外復何冀妻趙氏子家鳳家祥僕姚雲吳鳳皆死焉事聞議卹如例給騎都尉世職嗟乎吾鄉先輩臨難不苟者曩惟知陳忠節公問山耳今乃知又有太守其人微郭君爲之搜輯事實刊行傳略曷克致此太守於是爲不朽矣太守居邨舊有明永樂間

七級浮屠突兀凌霄而於日俄之役竟毀於礮火乃知有形之堅固猶不若公之能傳諸千古也太守又有自訂事略余在史館日得之爲輯其遺事入清史稿忠義傳亦所以致公於不朽云

題仙舫畫石贈王者賓

乙巳

形奇狀偉骨秀神清使米顛見之當袍笏下拜呼之爲兄然壁立於上俯視其下固迴超乎尋常之碌碌者而亦當戒其硜硜始克消融稜角底於渾成敬書數語以爲座右之銘

自警箴

乙巳

似勤而惰似剛而柔言有大而不忤德無恆而承羞與時俯仰抱質以游若非戰兢奮勵痛自矯揉終以腐同草木無所成就而貽

恨於千秋嗟乎生有自來逝有所爲豈獨子瞻頌昌黎爲然我亦
帝之所遣也奈何甘自菲薄飽食終日而忽忽悠悠

自厲箴

丙午

勿自矜勿自小勿自逸勿自擾勿大膽妄爲勿輕心是掉勿喪守
於泉貨勿移情於窈窕勿流學術於奇麗勿誤生平於溫飽勿以
臭味之異而露憎嫌勿以時局之艱而滋煩惱不患無位患所立
不患莫知求可知勿感慨牢騷而憾賞音之稀少見義勇爲識幾
貴早結默契於先賢通精誠於大造庶幾不違乎時不離乎道呼
將伯以維新蕩塵氛而力掃吁前路茫茫余懷渺渺苟非惕厲戰
兢宏茲偉抱烏能免於庸碌以終悠忽以老朽如木而腐如草

祭陳百川寶海文

丙午

嗚呼百川生而有述歿而可傳其同乎萬物生死而終歸於無物者乃形骸暫聚之天其不與萬物共盡而長留於斯世者以公之襟度本自卓然此自古聖哲莫不如是而爛然昭如日星者歷歷著於簡編嗚呼百川我昔與公素昧生平者也胡爲乎風水相遭倏然遇合豈非繫乎前緣追憶曩時瞬息三年當盜賊之蠡起人徹夜而不眠激予心之熱血誓剷除夫巨奸幸公助我挺身而前適逢其會不後不先迨盜魁之伏法遂立會以相聯盟神演劇聚衆萬千羨公老而益壯骨力蒼堅舉凡動靜張弛之際與夫斟酌事變當幾立斷胥能不避勞怨荷重任之仔肩愧我不才公以爲

賢力排衆議惟吾言之是用其默相契合而應之如響者眞無殊
乎石之投水箭之在弦惟公操縱得當深沈穩練是以盜賊屏迹
望望焉去之而不敢犯邊奈何北宇不靖毒肆腥羶歐亞互鬥釁
起狼煙因利害衝突而滋猜忌遂立奪我民會之利權搜查槍械
人遇輒牽使善良之家均手足無措盡喪其所恃眼含淚而涓涓
回看醜類狂喜欲顛如虎負嵎如魚躍淵陡惡狀之俱作復燒殺
而掠捐更加以尋仇蹈瑕藉詞糾纏講和不可調劑不敢進退兩
難撐拒無力惟徒手而握空拳嗚呼百川強鄰生忌賊惡不悛此
眞智勇俱困英雄無用武之地矣其何以轉牌動會指揮壯勇任
掉臂而迴旋予時在省兩地心懸上書請隊其期屢愆知公無策

萬慮熬煎避無可避遷無可遷嗣聞微服赴省尋予面議萬不料
公甫入城予已命駕就道奔吾伯兄之喪而返於里阡後驚公歿
慘劇可憐高堂老父華髮盈顛更兼以妻衰子弱零丁困苦居無
餘舍而耕無餘田嗚呼百川算遜彭篋遭憂患而長逝豈羽化而
登仙子獨何心灑涕漣漣緬此後之會衆誰著吾以先鞭謹厚者
怯迂拘者滯奸狡者擾欺詐者貪其餘泛泛悠悠之衆大都畏首
畏尾心瑣瑣而力孱孱嗚呼百川感公往事矢我精專爲清宿累
並竭誠虔爰擇良日特來致祭以慰公靈之在九泉

題高鈞閣小照

手握倭刀 丙午

吾昔有句云滿腔熱血結團體一片雄心看寶刀今觀君像意氣

甚豪願相與磨厲以須及鋒而試賦同澤賦同袍以挽回天下之滔滔

再題鈞閣小照

丙午

懷抱蘊諸內其外自然呈今觀君之像觸我無限情惟心樸而實故氣和而平然此競爭之時局也願更運以絕大之希望俾眉宇露其稜稜君不憶北使之語乎捉刀人乃真英雄彼其氣象當不待言而自明

與某君書

丙午

孔子論明在於浸潤之譖膚受之愬不行蓋心地篤實之人每易受人蒙蔽不料人情之詐僞世態之離奇此不得謂明也孔子謂

好仁不好學其蔽也愚學字工夫絕大夫不逆詐不億不信而能先覺其詣誠難遽臻然所以致此之由亦當精思而熟察之竊謂入手工夫只在鑑空衡平無論聽何人之言遇何人之事務要從容不迫預留轉身之地急躁必誤事和平必無咎使人不敢欺尤不若使我不受人之欺其身分乃更進也凡於天下事常人之所易忽略者必思之又思以至誠之道爲處事之本體而於詐僞欺飾之來必時時思患而預防之茲以簡括之詞相贈亦曰明而已矣此數年來所歷歷考驗而信爲必宜注意者也時局艱難需人孔急安得不相期以遠大願共勉之

祭張筱圃提學使文

戊申

維光緒三十有四年九月初五日奉天提學使張公薨於位越四日凶赴至遼凡遼屬官紳學各界人士聞之莫不同聲哀愴山川阻隔爰設公位遙祭於野而哭之以文曰嗚呼我公溘然竟往泰頽哲萎吾將安仰矧公盛德外樸內朗秉氣春和澄襟秋爽早掇巍科大學司講陳臬湘沅王事鞅掌所至有聲一空標榜忠信篤敬銘諸函丈政事文章一時無兩吾奉甲辰日俄擾攘喪亂卽平新知誰餉墨守陳編萌芽未長寧乏良材不逢大匠寧無成法草昧初創維時我公星軺來嚮挈領提綱光明大放新舊乘除不涉鹵莽孰忝臬比資之學養孰刺子衿軌諸勺象綜核名實不虛以枉剖抉洪纖不侈而廣矧茲學校官帑私帑一分浮糜萬姓疴癢

樽節物力持以勉強吾遼子弟尤荷宏獎中學是升規模宏敞各
校改觀迴殊疇曩若網在綱如示諸掌大冶甄陶蒸蒸日上來暮
方歌薤露忽唱天不憖遺功德難忘緬懷遺澤徒爲呼搶北望總
帷流涕頓顙式寫哀忱冀通肝蠻嗚呼我公名滿天壤敬爇瓣香
尙其鑒享

贈王岷源座右銘

戊申

贈王岷源座右銘

勿刻苛勿倨傲勿急促勿凌暴勿笑人之混混而矜己之了了勿
大膽以爲勿輕心是掉勿憎時局之渾濁勿厭世情之繁擾勿以
客非知己而憚於周旋勿以事不如意而頓生煩惱寬裕溫柔以
養心文理密察以學道不偏謂中不易謂庸惟中庸愈覺其神奇

能柔乃剛能弱乃強徒剛強卽鄰於勇標法豪傑而去其疵企聖
賢而深以造拯此時艱宏茲偉抱氣象則和和平平胸襟則落落
浩浩乃武乃文維妙維肖願銘諸座右佩若韋弦庶得其實中不
差分秒

送姪女桂瑄入省城節烈祠文

庚戌

維宣統二年歲次庚戌三月己未朔越二日辛酉第六叔袁金鎧
告於胞姪女奉旨旌表烈婦監生曲承麟之妻袁氏桂瑄之靈惟
爾淑姿夙敦禮教澤沐詩書藏修女校夫亡殉身節烈是倣援例
請旌欽奉明詔給銀建坊懿歟典要綽楔褒題貞心勁操入祠致
祭光遠有耀省垣有祠尊崇節孝春秋祀事守土躬造請准設位

爾德維肖爰於今辰附此堂廟爾其知之余爲此告

重刊原人跋

庚戌

宣統庚戌之秋高鈞閣大令歸自都門出桐城陳劍譚先生所著原人擬重刊於瀋陽以餉學界而廣其傳甚盛舉也昔寧陵呂叔簡謂學問到孔子地位始爲通通之外無學問陳先生原人一書殆可謂通歟去年金鎧赴京晤先生於世學士仁甫座上豪談一晝夜有相見恨晚之歎此爲訂交之始別後先生書冰雪胸中作肝膽龍蛇腕底如嬰兒聯語以贈愧未敢當也先生著作等身原人特其一種金鎧於此書外曾獲讀其寤言權制各若干卷皆感慨時事之言切中病痛今天下事變亟矣得位乘時者其施設或

未盡饜人意而懷抱瓌奇之士又往往徒託空言未必見諸實事
深可慨也刊印旣竣鈞閣屬識其緣起爲書此以歸之

自箴

甲寅

吾有日記廿三年矣求慊戒欺是其初旨爲日旣久不免懈弛俯
仰乾坤時事至此責任謂何嗚呼小子尺璧微瑕人其疵指大木
寸蠹人其詬訾矧即怠荒諸不如始內省懷疚外務日侈天人戰
爭此難勝彼其貌支持其病在裏不痛醫之禍烈未已謝傅風流
東山攜妓亦越寇萊服御奢靡彼有大醇不掩厥美我何人斯敢
以相比純哉武侯謹慎是止遠矣希文別抱憂喜憇憇赫誼豈鄰
偏倚予亦人也忍自辱毀追踪縱難師資在是天鑒匪遙敢忘顧

謏德業兩端以砥以礪求友求師孰源孰委握要之圖行己有恥
不愧爲人勉附於士窮歟達歟居易以俟若再因循聞義弗徙日
日年年聊復爾爾既不為人反求諸己碌碌以終其類有泚嗚呼
小人十指十視善葆良知前型是企道在眼前光陰逝水勿忝所
生天地考妣悔過圖功及茲未死

與孫鼎臣書

甲寅

王廉溪孝行肫篤人無間言清操勁節迥異常流事蹟昭然在人
耳目生平所最敬佩允爲我省有數人物豈祇海城之冠哉微聞
各省每有褒揚鄉賢之事近如朱經田之胞弟以哀毀終卽表而
出之其顯例也廉溪天性好淡決不好名然我輩能爲發起表彰

以勵末俗亦最有關係之事也廉溪歿後其子恆昌與弟來函言
身後之事皆趙君際亨料理弟當時油然動念不可遏止以爲廉
溪亦吾省之鄉賢也有大醇無小疵爲守俱優才德兼備偏於不
作事偏於好作事均不足與之並論亟應表彰勿令湮沒於是致
函趙君謝其料理之勞又微露此意請其徵求士紳之意嚮昨得
覆函言海城紳耆同聲悼歎如失所依表彰之事踴躍從事謂爲
當然毫無異議現已由縣呈請矣弟再覆函謂公與徐聘卿兩先
生皆深佩其爲人自必樂予贊助現既見諸事實不敢不以告也
此事既已發起即須貫徹始終昨已浼人向張令帥言之但使允
爲轉呈則不難達到目的耳祈兄注意及之我輩今日應作之事

惟讀書寫字與講求作人道理而已遇有關於人心風俗之舉則極力提倡之闡揚本省文獻尤爲應盡之責若並此等事亦漠然置之則眞無一事可作虛生此世可有可無問之良知尙不甚安也迂腐之論高明以爲何如

重印盛京通志跋

甲寅

舊本盛京通志纂於乾隆元年敍載簡略讀者憾焉民國三年偶於京師隆福寺書肆得乾隆四十三年欽定本凡一百三十卷增於舊本數倍蒐討東省文獻當以此爲巨觀致足貴也惟原書爲武英殿本當日印行無多刊版久已散失書賈居奇不可卽得適侯官張貞午先生新膺巡按奉天之命余乃建議由奉省將此書

重行付印用廣流傳先生欣然贊許爰以重價得之從此吾奉人
士可以家置一編日深其敬恭桑梓之思則此編之所關詎淺鮮

哉

...

...

...

...

...

...

備廬文存卷之一

備廬文存卷之二

遼陽袁金鎧潔珊

覆陳劍潭函

丙辰

項城既逝難題解決黃陂好善氣象一新方今大患不在外而在內方寸公私實爲禍福成敗之樞吾儕之所自處惟有畏天知命素位而行謹守勿渝庶幾可免盛武要好一念足以造福地方居今之世不操財權兵柄而欲有所成就徒自苦耳得志則陽德輝煌普施濟物不得志則陰行其德自結於天一切枝節都與埽盡庶免冒昧之咎世間眞能用先生者吾未之見應以著書立說自致不朽擇精語詳出以矜慎滌盡火氣善葆衰年是所望於先生

也蒼蒼者既別有位置胡弗善承其意世路荆棘插足良難默足

以容良用惕惕

覆康南海先生書

戊午

尊志未嘗一日去懷亦知終有見諸實行之日惟仰觀俯察正自有待若操之過急未見其可其喫緊處仍視力量如何廢興大事祇可承天一任自然不宜矯強歷驗往迹可不煩言而解也迹阻心通餘容續白

謝耿旅長惠酒牋

己未

尊使遙臨頒來佳釀拜登忭感口欲流涎弟初駐邊城每怪潑蘭饗客迺承雅贖居然好酒盈尊既慚太白之下筆百篇高眠市上

亦異士元之耽飲終日小視未陽惟時事如斯眼看盡醉而大夢
誰覺豈忍獨醒莫如把盞當歌庶幾銜杯樂聖略抒狂語用誌高
情

清授中憲大夫候補知府鄉諡剛靖徐公墓志銘

壬戌

金鎧生九年出就外傳今年五十有三矣其間讀書四十餘年凡
遇古人聖賢豪傑光明俊偉之行輒心嚮往之而以未嘗一見其
人爲憾光緒三十一年春予初謁盛京將軍趙公次山於軍府公
語金鎧曰遼陽徐珍客臘來見稱爾倡辦鄉團成績卓著其人不
妄許可所稱當可信也翌年二月予隨錦州知府王公采丞考察
警政路出邑南王公耳徐公之名招往千山劇談三日金鎧獲望

見公之顏色實自此始未幾趙公以公辦團成績入告稱其上不動支官款下不括取民財徒以忠義激勵之故護衛鄉閭保全無算乃由候選主簿以知縣遇缺即補金鎧亦獲隨公之後而同膺薦剡焉三十三年金鎧總董遼陽警務南路奸民以抗稅聚衆與公爲難其勢洶洶乃隨州牧歐陽公至浪子山曉諭鄉民事以獲解余並乘間馳至柳林子見公而慰藉之洎洪公未丹來權州篆劃分警權委金鎧親往各路董理其事乃往見公於吉峒峪之興隆溝一任金鎧之措置事竣公乃偕至邑城倡辦自治期成會宣統元年又同被選爲奉天全省諮議局議員昕夕聚首者凡三年歲辛亥趙公復來督東委公任巡防營幫統俄保公候補知府金

鎧亦忝保京堂蓋金鎧於十餘年來倡辦鄉團受知大府兩次列保皆步公之後塵此其拔茅連茹之故豈復他人所能比擬者哉公之歿金鎧旣爲輓詩若干首輓語若干聯以抒其痛而本邑諸君謂金鎧知公深復以銘墓之文相屬其曷敢辭謹按公諱珍字聘卿遼陽城東南興隆溝人讀書略通大義吉峒峪者距溝廿餘里爲鄉人辦會之所公年十九列席會務出言驚其長老甲午中東之役州牧徐公璵齋稔知公能委辦吉峒峪一帶團練防守要隘是時聽公驅策者多至三萬餘人布防設伏規畫井井敵軍不敢犯而吉峒峪鄉團之名至是乃著於中外會將兵者忌公名高乃以重農爲名散團歸里防務遂不可問庚子拳匪之亂長吏棄

城盜匪竄起奉省無寧土獨遼海鳳岫四城交界犬牙相錯之地
凡數百里賴公坐鎮無風鶴之警遇有伏莽竊發輒捕獲而置之
法甲辰日俄之戰兩邦將帥懼公爲左右袒嘗遣辯士來致結納
之意而我國之主兵者亦不時派員偵伺動靜公則一無所動嚴
守中立金鎧每謂公之生平得此三事即可垂諸不朽況又不止
於此耶其後警察徧設各縣分疆鄉團之勢較殺然各地時虞不
靖而吉峒峪之會界猶安堵如常則資公之餘威也公鬚髯戟張
聲弘若鐘氣宇威重見者悚異好善惡惡出於至誠甲午後曾至
吉林任隨營辦事官暨委員非其所好拂袖而歸生平不事家人
生產任公職後悉捐薪辦村學嘗謂吾家不需此錢其豪爽多類

此公生於道光己酉年九月十五日子時卒於民國壬戌年二月初九日寅時春秋七十有四配某氏子四長德謙業儒次德嘉德藩隨公辦團防皆蚤卒次德懋女三長字王氏未嫁卒次適任氏早孀季適潘氏德謙諷於是年三月十八日葬公於興隆溝祖塋鄉人以公功在地方所全者大謹援私諡之例易名剛靖從輿論也是宜有銘銘曰

猛虎在山藜藿不采岡嶺迴環大有人在擾攘風雲橫飛滄海已而已而從政者殆神龍蟄地公胡不待知公者誰爲銘者鐙嗚呼此聖賢豪傑之流亞宜蜚聲乎千載

祭徐剛靖公文

壬戌

嗚呼是翁曠世之雄譽馳域外名滿關東聲威赫赫光氣熊熊有
英雄概有烈士風川淳嶽峙間氣所鍾憶昔甲午強敵來攻遼海
岌岌戎馬倥傯公率鄉勇奮起圖功旌麾所指威比元戎泊乎拳
亂官舍爲空土匪肆擾羣起如蠶人不安枕蝨賊內訌賴公固防
剪厥頑凶商農以保甲兵羅胸甲辰之役日俄爭鋒東省一隅處
處狼烽公無所袒保我牆墉無偏無倚合乎中庸回溯三事條理
始終山有猛虎海有神龍孰敢予侮開塞爲通登民衽席覆以帡
幪我隨驥尾敬佩由衷荷公提掖麻中植蓬想公偉度量雅襟沖
其行敬篤其言信忠清白作事圭璧飭躬實事求是聲望日隆忝
忌者衆短淺其瞳怡然處之休休有容嘗捐廉俸創建巒宮不自

潤澤嘉惠學童似此品概千尺之桐雲霄一羽橫絕太空同甫奇
概田疇高蹤積累者大業廣德充吉峒之峪碧草丹楓俯視今古
拔出人叢令威化鶴氣作長虹人民城郭應念遼東社祀之禮惟
公宜崇鄉謚之議萬口攸同馨香報德悠久無窮尙享

學敬齋遺稿序

甲子

嗚呼吾觀於古今人才之難得及其修短之數而不禁爲之慨然
也昔者有人痛崔蘭生國琚之死曰謂造物忌才斯人何以生謂
造物愛才斯人何以死彼蒼蒼者殆不可測其謂是耶吾於李君
組珊亦同此恨君爲遼陽西八里莊人往在清初吾家亦居於是
後乃移居城北而君家亦莊之舊族也君年弱冠從名宿房仲南

先生遊爲又有奇氣試輒冠軍補承德縣博士弟子員已而食餼
光緒丙申冬余在省垣晤君於高子華廷厲廬一見如舊遂與訂
交翌年君館於呂方寺村蘇氏蘇氏余岳家也余亦設帳於本村
相距十里暇輒過從與講身心性命之學並究詩古文辭又翌年
余改館於鐘子溝白氏而君則仍舊相與創爲文會與會者侯子

汝康

乃封遼陽優貢

馬子子亨

榮春漢軍生員

高子鈞閣

統衡滿洲副貢

尹子瑞芝

榮祺漢軍

生員

合君及余共六人每一藝成則送尹曉泉先生

果漢軍進士內閣中書重賦鹿

鳴加侍讀銜主講萃升書院

批閱已亥余移館省垣君就館邑城相距稍遠庚

子夏余應考遼陽賓興與君遇讀所爲制藝意境益深近於大家

癸卯君以國學生往應順天鄉試於河南

時承德停考順天鄉試借河南貢院舉行錄

科試文最佳考官蒙古世學士仁甫

時官司業

擬置第一人改列第二

榜發知爲鄉人親來訪君稱歎不置臨場君忽大病未與試而歸時余方辦鄉團日不暇給遂不及晤君後知君染疫遽歸道山亦以人事恩迫不暇往弔乙巳八月因事罣累被羈於警務課乃補作哭君詩二律有粗枝大葉多奇態璞玉渾金含至精之語以狀其文餘語不復記憶前年偶爲憶亡友詩十二首其一云排山倒海入青冥雄健渾虛勢建瓴一自玉樓膺帝召遼東從此黯文星蓋以咏君亦深惜之也君歿無子家計日落父猶在堂以思子甚鬱鬱而逝余曾爲介弟文簡覓小差以資生計蓋自余與君訂交以迄於是駸駸十餘年矣君天性懇摯篤於倫紀待物一出至誠

貌樸而訥於言才氣縱橫跌宕奇偉恣肆不可思議而酷嗜宋五
子書尤服膺徽國至易名以見意其爲學以明體達用守先待後
爲己任所爲詩古文辭沈思獨往憂憂獨造其力厚其氣渾其義
精其味永於唐宋八家外別闢一境每一篇出讀者咋舌蓋天賦
旣優復益以學力造詣日深故爲人所難及使天畀以中壽必能
著等身書以比於古之作者乃甫逾三十遽夭其年胸中所蘊不
獲盡宣凡知君者皆爲歎惋非僅余一人之私痛也君之遺文多
散軼未能彙輯今年六月晤齊君蓬閣國鎮於濱江謂曩從君受
業有抄存若干首余取而讀之多爲向所未見遂並河南試牘四
首付諸手民以永其傳又君所著聖學梗概臚說暨其他文字尙

待搜輯付印嗟乎當年爲文會者六人侯子馬子暨君均已先歿
高子華廷亦於民國初年下世訪舊半爲鬼驚呼熱中腸讀少陵
詩可爲慨然或謂一卷可傳天札亦神明之壽君之遺稿傳於世
則君之名亦藉以不朽且世之人每以一死生齊彭殤號爲曠達
然生才如君所得僅此天實爲之謂之何哉余序君之遺文不禁
感喟之交集也君名文毓字祝三一字組珊號訥夫後易名學朱
卒年三十有一余工畫亦自異意與君然無不皆志於官而
宋星五遺著序乙丑 謝朝士策子員撰曹子繼夫主議與家國
往者題海城于思泊山居讀書圖有李子健筆扛海潮湧浩淼宋
子鶩清堅抗希耽孤峭之句一謂李子組珊一謂宋君惺吾也余

於組珊遺文既序而刊之今年金君靜菴復搜輯惺吾詩文若干首擬爲刊行徵序於余余與惺吾交最久知之甚深其曷敢辭光緒己丑余年二十初補博士弟子員從曹子鐸先生遊與君同硯習爲應制文君少余二歲兀岸自異意度廓然屢不得志於有司迨科舉停遂蟄居不出自是致力於古文辭爲之甚專乙巳之歲余至其家見其近製真摯動人詞筆簡勁始知別後功力之深未易窺測戊申余主辦遼陽自治期成會邀君掌文牘壬子君又主編共和實錄甲寅余在清史館薦君爲名譽協修適烏拉成君澹堪物色能古文者爲子弟師乃薦君往澹堪爲當代詩學巨擘賢嘉水乳相得甚歡駐烏拉二載並治詩與唱和丙辰春奉天省教

育會倡設國文專修科君爲教授蒙古世仁甫學士同主講席見君所爲古文極口稱之校之高材生學古文者皆稟承規範嚴守義法羣有得師之幸旋入省署治案牘頗窘於生計己未余在卜奎君以宿疾歿於奉垣年四十八無子僅遺寡妻弱弟貧無以殮久之乃克葬君治古文篤守桐城義法切理饜心章妥句適無泛響無浮光而歸之於真切雅潔氣局蒼堅骨力遒勁視世之徒襲古人皮毛以塗飾爲工者殊有眞僞之別使天假以年所詣當不止此余與論交近三十年以道義相砥礪世多謂君眞率不諧於俗余以爲如此乃不愧爲讀書人良可慨也靜菴好學深思抗希有志所居距君家十里嘗汲君之餘風爲輯遺文刊以行世其好

尙可知矣君名玉奎字星五一字惺吾遼陽人

陳季芳先生重編百家姓序

乙丑

百家姓一書相傳編自宋時首列趙錢者趙爲帝室姓錢爲武肅後裔海內第一望族也顧其書以韻綴屬殊無意義讀之味同嚼蠟有清仁廟曾改製此書首曰孔師闕黨孟席齊梁寓尊崇聖哲之意此眞不朽之巨製也不知當時何未頒行沿而仍用舊本致令見者絕少甚可怪也吾鄉陳季芳先生敦品績學負士林重望曩見所撰女兒古鑑徵引繁富措詞雅馴余已詫爲創見頃聞馬君壽山又持此編見示蓋爲先生司鐸平山時所撰首曰童須蒙養師賴聞人每字連綴皆有深意正與仁廟御製之本不謀而合

組織精密良工心苦豈腹笥空疏胸無鑪錘所能道其隻字雖能
否通行斯世尙在不可知之數然以視舊本則復乎遠矣

呂邨鋤園圖序

丙寅

余家承先世遺蔭薄有中人之產自光緒甲午率於木村巨獄傷
耗無算庚子之變又復毀於兵燹延至戊申歲生計益不支析爨
之後蓋無一瓦之覆一隴之植余時籌辦遼陽自治室人蘇利貞
坤亨攜子女徙呂方寺邨賃屋而居食貧自勵拾薪種菜勤苦備
嘗每念曩時不忘在莒溷陽孫玉泉爲寫呂邨鋤園圖旣成余乃
敘繪圖之意留示後人殆亦古人繪無逸之遺意歟

馬氏五誌書後

丁卯

自來忠烈之士成仁取義大節昭然載在簡編垂名千古其浩氣
精光不可磨滅後之人得其遺蹟形諸詠歌珍如拱璧慨慕流連
不能自己況遺蹟而爲墓誌足括其生平者乎況忠烈而爲鄉先
達與吾同桑梓者乎其宜珍惜保存不待言矣客冬金鎧在京聞
畿輔先哲祠存有遼陽馬文毅公雄鎮墓誌係其後裔鬻墓田時
發見誌石爲某商所得將鑿毀字迹轉售以漁利直隸某君見之
重公忠烈戚然不忍購置祠中余聞而有動於中立邀梁君素文
玉書陳君慈首思驅車往訪見纍纍十石臥置牆下拂塵諦視公
誌而外爲公父潤甫制軍長子世濟參議冢婦董夫人長孫國楨
方伯諸誌撰文及書丹者皆當時名公鉅卿覽之肅然起敬乃囑

奉天會館董事安君瀛澄

海瀾

因直隸會館董事蘇君漢樵磋商

所以取歸之意最後荷直隸諸君之讓與由余捐助會費三百元

以致謝忱而此十石遂運歸奉天會館存貯焉

後歸奉天省垣博物館

惟思

獲此瓌寶允宜設法保存置諸不毀之地並藉氈蠟公諸同好以

廣其傳兼爲籌款計詢諸同人僉以爲然乃搨誌文五百份酌增

其直分送各方既訂保存方法復詳其始末刻之於石此舉也表

揚忠烈開通文化保守古蹟敦篤鄉誼數義俱備並以厲馬氏之

後裔不自振作而忘其先者而公之英靈不惟著於當時傳於後

世並能庇其墓誌俾鄉之人愛惜保存傳之無窮播爲藝林佳話

則人亦何苦而不爲善以自振拔也哉至公殉難原委具載誌中

不復贅云

祭渾源田子琮先生文

丁卯

嗚呼子琮別纔五日電耗遽凶以病狀言固非意外事然竊冀厄運之不果逢胡斯人而有斯疾如狩獲麟如壁飛龍合雖人琴之俱亡兮猶能彷彿君之音容憶民三之約法受政府之應供邂逅相遇水乳交醴更互唱答于于喁喁團城席罷史館偕從朝夕晤對傾吐積悰以夙昔之少所許可何獨刮目於兆傭迨參政之歸去避籌安而潛蹤倏長樞祕蓮幕重重君來訪我空谷音聲相與瞻仰故殿展觀塵封方謂此席非異人任宜爲東國之所宗我遊黑哈君長議峰持論正大胥避其鋒間亦領袖大學鼙鼓蓼蓼以

客歲之擾攘逞赤燄之匈匈君獨主持大計發抒心胸聯合鄰省
鞏固疆墉如石之固如金在鎔此舉實有關於北方之全局固不
獨詞章庾鮑政績黃龔詩追李杜筆寫義邕乃真不愧酈陸之奉
使藺毛之折衝晉兵一出頓息妖烽綢繆家室綏靖士農翦鋤蛇
虺撲滅蠹蜂申大義於斧鉞翹勁節於筠松晉民實永世受其賜
豈讓當年佐霸之衰偃有以攄其略而奏其庸嗚呼子琮雲山三
晉間氣所鍾省以人重印印顛顛綺歲名噪出水芙蓉秋榜桂馥
特科廷彤辭內長而不就事在去夏與客冬蓋綜生平而論政事
文學有典有則老謀卓識不蔓不鬆高自位置不遺菲葑對我每
商榷著述斟酌出處其相應如鼓鐘比陳雷之義合如僑札之意

濃京津路上躡蹻攜筇鎮日相對態度雍雍胡爲西河抱痛氣索
神慵二豎作祟往來憧憧肺炎滋患並害鼻癰委頓不起幾廢殮
饗哲人其萎逝水溶溶存順歿寧明神敬恭嗚呼尙饗

內務部總長渾源田君墓誌銘

丁卯

民國十六年歲次丁卯二月十九日田君子琮歿於京寓時余在
奉天今安國軍總司令鎮威上將軍張公電邀至京照料喪事葬
有日矣君友康君士鐸來商埋幽之文督余爲之銘余於民國三
年約法會議與君訂交今十四年矣相知甚深近年以世變遷流
奉晉結合嘗共周旋所繫尤鉅其何敢辭君諱應璜字子琮山西
渾源人也曾祖望雲附貢祖九疇道光壬辰舉人沁水教諭父延

年同治壬戌舉人長子教諭母氏程君承家學工詩文精究歷史兵法受知陳中丞啓泰以廩膳生入省垣令德堂肄業爲高才生光緒甲午舉於鄉官屯留學博與經濟特科試庚子後山西大學成立君任教授多所成就部選湖北來鳳縣知縣張制軍之洞派赴日本考察政治回國赴本任調恩施辛亥政變維持秩序境賴以安民國紀元之春晉督閻公邀君回省畀長民政不就任高等顧問軍府大事諮而後行二年九月中央電令署北路觀察使不就三年被選爲參議員嗣與約法會議兼纂修清史四年任山西大學校長以國會恢復辭校職六年國會再被解散充山西代表往來京津漢各地咸以領袖推之七年二屆國會當選參議員被

舉副議長八年閣議提長教育以病辭九年會辦賑務籌畫精密全活甚衆十年冬始竣事十一年國會恢復仍居議席十四年冬時事日紛閻公欲南合武漢東結奉省進而解決時局以茲事體大非君莫屬乃奔走京保津奉籌商大計十五年特任內務總長仍以病辭大同雁門之戰包頭五原之役奉晉合作赤氛日消君以一身摭拄其間余亦相與接洽朝夕晤商冀無隔閡本年病勢日劇竟以不起政府明令表章國史立傳閻公以君盡瘁桑梓厥功甚偉爲營喪葬兼籌身後詩曰人之云亡邦國殄瘁君足以當之又曰肇敏戎公用錫爾祉閻公有焉君生於同治乙丑七月十日壽六十有三配楊夫人先卒子汝弼出嗣汝庚先卒女五適劉

郭班馬蘇孫男瑞徵孫女瑞豐瑞盈五月一日葬於渾源縣北海
邨祖塋之南新阡以楊夫人祔銘曰

乃如之人兮維德之行文武是憲休有烈光遐不作人金玉其相
敷政優優萬民所望肆皇天弗尙如蝸如蟻復我邦族德音不忘
或哲或謀夙夜不違我勞如何終然允臧東門之楊其葉泝泝斂
蔓於野零露瀼瀼享祀不忒顧予烝嘗子子孫孫受福無疆

公祭東三省會館鄉賢祠設位諸公文

丁卯

維中華民國十六年丁卯之秋七月既望吉林徐鼐霖齊耀珊齊
耀城成多祿奉天袁金鎧安海瀾梁玉書那文裕等謹以清酌庶
羞之品致祭於東三省會館鄉賢祠前已設位之額忠毅公

御前
大臣

太子太保署鑲藍旗滿洲都統一等威
勇侯晉封三等公字珠軒諱額勒登保
伊壯愍公 頭品頂戴副都

統額伊 哈剛恪公 晉贈太子少保鑲紅旗漢軍都
興額 統襲一等威勇侯諱哈嘜阿 昇勤直公 太子

禮部尚書 陳忠節公 贈太常寺卿江南江安十
諱昇寅 府糧儲道字問山諱克讓 王公爾烈 大理寺

臚字 劉公作肅 贈道銜署廣西太平府知
瑤峰 府龍州廳同知字敬亭 常公紀 恩卹道銜四川

理齋 慶公吉 四品銜盛京鑲藍漢軍防禦
張姓字篤亭工書善畫蝶 姚公國振 恩卹道銜運州

知州湖北麻 四公達色 潘全公奎 字子
城縣知縣 陽 秦公聚奎 署直隸大順廣

寺卿諡 多公隆阿 拔貢生字雯
剛烈 溪莊河人 何公維墀 山西平陽 文公楷 候補

盛京鑲藍旗漢軍 十六人暨新設位之圖文襄公 配享太廟太子
驍騎校字式軒 太傅內秘書院大學 范忠貞公 贈兵部尚書

學士字麟 范文肅公 士字憲斗諱文程 范忠貞公 贈兵部尚書
洲諱圖海 太子憲斗諱文程 范忠貞公 太子少保福

建總督字螺 馬文毅公 贈太子太傅兵部尚書廣
山諱承謨 西巡撫字坦公諱雄鎮 尹文端公 殿大華

學士字望山 **海武壯公** 領侍衛內大臣一等 **文文忠公** 武英殿大學士字博

川諱 **都清直公** 盛京將軍字直 **多忠武公** 贈太子太保封一等男

阿隆 **金忠介公** 伊犁將軍字順 **長忠靖公** 吉林將軍字順 **依誠勇公** 盛京

依克唐阿 **慶勤僖公** 西寧辦事大臣 **徐剛靖公** 候補知府鄉諱 剛

佟公養甲 兩廣總督 **李公鏞** 君字鐵君 **徐公國相** 湖廣總督 **李**

公秉衡 長江巡閱使四川總督 **李公鶴年** 河道總督 **于公蔭霖** 河南

棠字次 **宋公小濂** 東路督辦黑龍梅 **錫公鈞** 翰林院學士 **貽公穀** 綏遠將

人 **于公凌辰** 署禮部侍郎通 **姚公協贊** 陝西糧儲道署 **齊公忠甲**

掌山西道監察御 **孫公百斛** 奉天民政司使 **張公露恩** 四品銜農

史編修字迪生 **呂公聯珠** 盛京內務府司 **于公甫筠** 卹予雲騎尉世職熱河

張公程九

卹贈知府銜予雲 楊公迺賡

甘肅渭川道道尹內

三十

二人共四十八人之位前而告之以文曰維德言功曰三不朽相

彼諸賢為羣倫首三省舊館祠之已久惟十六人無獨有偶桑梓

敬恭熟於人口會館重修掃除宿垢革故鼎新輪奐聖黜

原有房五十一

間歲久失修茲添蓋二間共五十三間翻蓋六間挑頂四間揭瓦

簷頭二十五間下餘全部加隴見新羣牆重砌一切油飾以及添

購修理零件共用洋二千零八十九元一角五分 乃眷鄉賢猶缺

某某公議設位

會議時鼎霖權珊耀城多

得卅二叟鐘鼎銘勳功

輔元后忠節堅貞聲震九有德行卓卓復推作手

以上三者為正祀

或服

館務勞怨奔走公益為懷取與不苟

凡屬此者為附祀

仰此諸賢泰山北

斗矜式鄉邦有為有守其或有遺未敢稍後

三省名臣循吏史不絕書此外遺漏尚多

不能

茲列几筵敬羅肴酒

嗣後每年清明節中元節十月朔日除夕均致祭每月朔望上香

如在

其上如在左右維神其歆降福無咎尙享

馬氏重興記識語

丁卯

馬氏五誌得之客冬置諸奉館桑梓敬恭昨方刻記冀保遺蹤豈意家集陡然相逢元愷所纂抒其臆胸鉅細不遺水複山重家庭瑣屑廊廟勳庸靡弗筆載包括胥容無意之遇空谷音覓鬼神呵護揣測無從大呼奇絕玄妙之宗精誠所感四達弗壅不思而得銅山應鐘會逢其適曰惟兆傭

祭趙次珊先生文

丁卯

嗚呼我公憂勤體國謹慎持躬心常自咎口不言功慨蒼茫之身

世抱悱惻之苦衷茲當騎箕天上蛻影塵中其大者關於我公生平之德業其小者係於金鎧知遇之始終誼豈忍於緘默語亦未敢從同溯我公之盛蹟仰已往之高風家承儒術世篤貞忠詞林繡虎御史避驄迨一麾之出守結知遇於兩宮嗣軍符之旋假奏偉略於遼東更訂官制祛闕求融興利鋤弊不遺細洪憶金鎧之召謁荷特賞於焦桐一見如舊相識受言肯納箴攻謂我忠清亮直知明處當性情耿介學識宏通陳諸薦牘上達廷彤以縣令與京卿後先請補揚側陋而躋寵從旋督鄂蜀來去恩恩值總制三省之命下歡迎遍夫白叟黃童辛亥政變外憂內訌公以東省處特別地位宜隨朝局爲轉移不能輕自搖動壞根本而召外戎乃

籌保安振噴發聾盡瘁從事憂心忡忡精誠所至積明生聰處置
靡弗得當譬良醫之起疲癯保我三省納諸併幪俾外人駭視而
驚佩上可感格於蒼穹豈特賜麟兒以娛晚景並宜尸祝千禩永
享馨香俎豆建廟貌之嚴崇解組歸來甘作田翁復史館之膺聘
肩著作之隆隆前後歷十有四載朝考夕究殫心磨礱編排纂述
大冶金銅含辛茹苦毀任垢蒙卒克脫稿收拾殘叢昭鴻編於萬
世如曉日之曠曠蓋綜公生平而論實事求是向不蹈空追踪賢
哲晰理淵融厲操清潔矢志謙沖每內省若不及恆午夜之怵怵
故自視欲然以无補自號夫何嘗躊躇滿志自信爲大用外腓而
眞體內充然勤勞匪懈恭儉自持繫念民生關懷家國其愷惻慈

祥之德意實與人以共見足以揭示千古於靡窮今則哲人其萎
徒仰嶽嵩淒清節候黃菊丹楓將歸秦麓埋璧藏虹金鎧潔陳肴
醴黍韭松敬奠筵几表我微悰

祭王岷源省長文

丁卯

嗚呼岷源遽賦騎鯨其不可復聞者君之警效其不能遂忘者君
之生平憶與君遇始於萃升重君節概磊落縱橫文藝出衆氣宇
崢嶸金蘭訂契車笠結盟庚子判袂拳匪勢轟君棲藥市我練鄉
兵薦君警校造就羣英遂並推以辦警有驚人之一鳴洎事機之
齟齬又起君而將迎底三載之美績達姓名於帝京迨辛亥之政
變復須君以有成軍械製廠警察開廳保安立會巡防練營晉秩

五馬奮翮鵬程收復鐵嶺卓著能聲擢長民政驟躋簪纓一聞違
言氣骨彌貞南金歸去月皎風清俄觀察於東邊駛使車而邁征
雖敷政之未久實公正而廉明遭兵變之波折持改革之權衡長
吏亦謂其當竟趑趄而不行君又拂袖而去露勁節之稜稜余念
長才不可廢棄爲思慮之交縈乃勸君出榷稅政以計紉而酌贏
驀臨溟之秉政遂發軔於會城清丈官地聲聞錚錚刷新警務淨
掃欃槍擔當財政艱鉅交并省篆兼攝力果心精森嚴壁壘孤危
力撐其氣魄似張太岳之剛斷其才略似劉士安之淵泓吏咸懷
威而畏法無敢爲弊竇之顯呈當時之譽君者則曰此眞命世之
英其不知君者每每肆其擊抨且歸咎於推轂初不予以薦士之

名時事日亟政見相爭翻然歸里靜掩柴荆心迹昭然自見性情
三徵不出漠視干旌於是論者咸佩介節之超特頓易前日之論
評即當年數數推挽者亦若具知人之鑑而與有殊榮嗚呼時事
擾攘蝸蟻沸羹百年轉瞬孰不虛生其真如君所言死果無知也
耶抑如吾之所說身雖死而不滅其靈精是非因果歷歷不爽自
有其可重與可輕

備廬文存卷之二

備廬文存卷之三

賦以其人各各東顧武生滿樹青卷昌遼陽袁金鑑潔珊以瀛里

繆蘭皋先生詩序

戊辰

繆劍翁翁翁翁高勉天籟自御至靜而

金鑑生也晚不獲與鄉先輩之治詩者聯吟詠接警效每引以爲憾事而新學後生見聞淺陋輒自薄其鄉以爲絕無詩人吁何其謬也遼東詩人至金代即見稱遼陽張浩然熊岳王黃華皆卓卓可傳元代以湛然居士爲尤著有清一代作者益夥熙朝雅頌集所載遼東人爲多金鑑近年留意鄉邦掌故旁蒐博采如李廌青戴遂堂陳石閭馬匯川曹棟亭朱海愚夢文子尹望山高章之沈香餘劉山樵王雪樵魏子亨諸家詩集罔弗購求其無刻本者則

借鈔之省內外友朋譚文藝喜購書者知金鎧孳孳此事往往代
爲搜訪馳書相告於是金君息侯以瀋陽繆公蘭皋寫本詩稿見
贈蓋往日得於北京海王邨書肆者時公之曾孫東麟先生搜輯
遺稿方憾缺軼因以所得轉贈先生謀將付印屬爲製序誼不得
辭按公諱公恩字棊澥號蘭皋隸漢軍旗籍官盛京禮部右翼官
學助教善書能詩精篆刻工寫蘭與陽湖洪稚存交最篤又嘗與
錦縣金巒坡鐵嶺尙鐵峰魏子亨遼陽王義門莊河多雯溪諸君
相唱和其詩不以絕幽鑿險爲能襟懷高淡天籟自鳴至情流露
如見其人今者東麟先生誦揚清芬昌明先業而金鎧亦以鄉里
後輩仰汲流風又因良朋佳貺俾鄉賢遺稿不至終於失散益當

振刷精神蒐求先輩遺著傳播於世庶承學之士不妄菲薄先民
因以擴充見聞奉爲師楷其於吾鄉之文運或不無小補耶

祭東三省會館鄉賢祠續行設位文

戊辰

維中華民國十七年歲次戊辰閏二月望日清明節徐鼎霖齊耀
珊張濟新袁金鎧安海瀾王家瑞梁玉書那文裕等謹以清酌庶
羞之品致祭於東三省會館鄉賢祠設位之

恩忠愍中丞壽眉峰將軍施公濟航曾公與九四公之位前而告
之以文維公遭際迍邐猝遇民黨舒皖風雲忠魂激盪庚子拳禍
龍江濤莽報國精忠義烈壯往滇池政績龔黃嗣響五馬風高遂
民長養中州持衡文星耀朗洪水悠悠澤流洸養或殉國難名留

天壤或膺州寄仁聲施廣桑梓增光生人敬仰設位鄉祠舉堪想
像以妥以侑誠通臍蠻明德馨香伏維尙享

遼東三家詩鈔序

戊辰

隄巢雷溪與大谷山堂三集原槧在吳興劉君翰怡

承幹

處今春

長白金息侯

梁

商諸翰怡以其版片讓歸奉天此可紀之盛舉也

隄巢集者李徵君廌青著徵君隸漢軍旗籍於奉天之鐵嶺雷溪

集者馬山人大鉢著山人系出長白籍於吉林之烏拉大谷山堂

集者夢謝山侍郎著侍郎爲蒙古旗人三公世系皆出遼東故總

名曰遼東三家詩鈔從其朔也當康乾之盛海內詩人有遼東三

老之號三老者廌青大鉢與戴遂堂也或不數大鉢而益以陳石

閩遂堂有慶芝堂詩集早已刊行石閩遂白堂詩稿近由懷德榮
祉字孝廉文祚刊版行世皆足與廌青大鉢謝山三家之詩驂驪
後先傳諸不朽者也謹按三家之詩源本漢魏上接風雅境地甚
高視如身心性命非徒以靡麗爲工者可比讀是詩者當自知之
非余一人之私言也山人有傳原刊具在今並附刊徵君侍郎兩
傳俾讀者展卷而知其人版片歸奉之後自當廣爲印行以永其
傳而翰怡息侯兩君之盛誼亦可藉以表見又豈祇吾鄉後學得
所師承爲遼東文運所關已哉余經辦此事悉其顛末故爲之序
以告來者

祭洪未丹先生文

己巳

維中華民國十有八年二月八日遼陽袁金鎧謹以清酌庶羞之
品致祭於亡友前知遼陽州事洪公未丹之靈嗚呼未丹末路大
難如伯牛之有疾比范叔而尤寒形銷骨立步履蹒跚冀少延夫
時日胡倏忽而蓋棺靈徂物化目觸神酸爲籌殯殮飾終差完勉
輸友誼未敢自安憶君早歲桂榜鵬搏秋曹秉筆識冠一般維新
志銳撫時興歎迨戊戌之政變易別字而眉攢以提學署之成績
涖吾邑而爲宰官下車伊始雅遂瞻韓追隨兩載相得甚歡佩君
文采翩若翔鸞萬言筆注如水下灘曉風殘月馳譽詞壇尤工小
令玉漱霞餐冷然意遠韻曼琅玕政持體要節儉溫寬振商興學
鄭重法團整飭警務安良鋤奸提倡自治表正形端惠澤覃敷雨

零露溥循良報最民口碑刊棠甘麥秀遐邇臚驩初依葭玉嗣締

金蘭去遼以後宦海翻瀾少順多逆意興闌珊自菊君之曇化

君之

側室益摧折其肺肝悒鬱頹喪幾於自殘悠悠日月虛擲雙丸遂不

自振聲嘶力殫糾纏疾病百孔千瘡一寒至此脂竭膏乾溘然蛻

棄烏倦飛翰黃梁一枕夢覺邯鄲露電泡影盡付指彈迢遙鄉國

湘水漫漫嗚呼未丹收場潦倒慘不忍看委脫陋巷幾乏瓢簞塵

封甌冷絮敗衣禪路人惻怛雪涕瀾洑豈身心之學猶有限抑阨

逆之運數所干君靈不泯歆茲杯盤追述往蹟我語豈謾麥舟之

誼綿力分攤送君南返首邱峯巒祖阡歸瘞地下團欒惟死者長

已矣極人生之悲觀尙享

題世仁甫學士遺像

庚午

我思老輩遙遙疏別知之未深論亦不切與公同時風誼夙結茲
爲月旦或殊莽裂公篤內行不避迂拙事母孺孝能慰苦節嗜書
績學筆清詞潔聯捷甲科躋於卿列司鐸國庠詩書敦說愛鄉情
深喜表前哲叢錄遺稿冀勿失齧傳人人傳因果符轍言忠行篤
口苦腸熱禔躬圭璧勵操冰雪教授生徒具廣長舌講貫藝文一
編尤絕綜厥生平純然無缺守先待後儒林之傑古稀雖屆猶期
大耋遽歸道山增人愴咽

告无補老人文

庚午

維中華民國十九年一月十日前清史館總理發刊事宜袁金鎧

因史稿事竣謹以清酌庶羞之品祭於前清史館館長无補老人
趙公之位前而告之以文史稿之刊鐙創斯議采及芻蕘荷公不
棄病榻慙慙屬以重寄敢不勉擔以完公志時局岌岌稍縱卽逝
九仞爲山功虧一簣夙夜戰兢冰淵是惴備歷困難孤行一意經
權互用至再至四果屆一年志業遂畢一百卅册五百卷字容有
疏漏實具大致旣以稿名何責精備協贊有功息侯是比急起直
追多資助臂迨政局更已竣銓次倖獲竟功微志克遂關外四百
貧糧分饋彌綸彝憲寵膺額賜館本查封另有見地各有是非或
公或祕此不足恠乃意中事稿旣流傳光惡能闕知罪不恤付之
後世論亦何常任褻任刺稿削史成肯忘所自後有定評吾言不

易在天之靈庶慰寤寐謹陳顛末齋明以祀敢告

跋恆諺記

庚午

恆諺記者瀋陽呂星五先生之所著也先生學本程朱躬行實踐不媿純儒誠闇然有道之君子余與交游近二十年繩愆糾謬受益良多奉作師資懼孤期待者久矣先生講學之餘手纂是書以諺語之流傳爲門類之分輯引伸指示援古證今似淺而實深似粗而實精即視爲先生之語錄無不可也余與白君佩珩經辦通志採搜遺文得先生此書以有關於世道人心爰爲印行以廣流布余每謂吾省自賀黃門入鄉賢祠後名賢固不乏人而先生實足當鄉賢而無愧憶先生歸道山時余爲輓言云名閥有傳人呂

叔簡以還眞堪繼武鄉賢應入祀賀克恭而後得與斯文非阿好之言也此後人手一編共淑先生之教其餘韻流風沾丐後學豈有旣哉

跋課己錄

庚午

瀋陽呂星五先生恆諺記余旣跋其後而爲之印行矣其受業甥董君咸章復出先生手書課己錄一編佩珩館長讀而善之爲附於恆諺記後並爲印行余惟先生生平律已至嚴視聽言動非禮必防凜然若天日之照臨聖神之監視故於一動念一舉足間罔弗戰戰兢兢惟恐肆意不知者以爲如苦行僧而先生固童而習之樂此不疲居常所見儒修之士日以改過遷善爲念未嘗無人

而乾乾不息純乎其純虛心求益撝謙自矢固舍先生莫屬也今
觀其課己之語切理饜心必無憾而後安其隱微獨覺之地毫無
寬假之處用能造到孝友躬行品端學粹境地里閻矜式夫豈偶
然世有讀聖賢書徒供口耳之資不知身心性命爲何事者聞先
生之風亦可以少愧矣余夙聞先生之緒論自待不肯後於恆人
而闊疏處多縝密處少時念純修輒覺媿對覆誦是編不禁怦然
願吾鄉學子見是書者省身寡過課己從嚴庶歲月悠悠不至叢
過招尤豈惟學修之幸邦家之光是亦印行此編之意也夫

徐行清制軍故里鐫石記

庚午

余聞江南諸省其邨落路旁每立石碣題曰某人故里所以不忘

前哲使人有所觀感也吾省風氣敦樸雖有名人亦眇爲之表章者如同里徐行清制軍歷官皖楚政績卓然載在典籍其一人也吾讀康熙實錄知其罷官非尋常獲戾可比乃商之邨人暨公之後昆在邨路立一石碣大書徐行清制軍故里七字於上背鐫傳略曰公諱國相字行清漢軍正藍旗人家於遼陽城東北之山岳鋪以諸生起家累官安徽巡撫有善政皖人建祠祀之事詳安徽通志升授湖廣總督調劑兵民整飭綱紀宜民之政次第舉行楚人被其德勒石以垂不朽康熙己卯五月卒年六十有六桐城張文端公英撰神道碑文謂公生平公正報國寬厚與人明敏決事慈惠及物節鉞江楚遺澤不泯可謂一代偉人事蹟載畿輔先哲

名臣傳中華民國十九年庚午七月同里後學袁金鎧書

祭王聘卿先生文

庚午

維中華民國十九年九月日前故宮博物院保管委員會副委員長袁金鎧謹託北平奉天會館館員那文裕以清酌庶羞代表致祭前故宮博物院保管委員會委員長王聘卿先生之靈而告之以文嗚呼我公國之耆老甫屆古稀倏歸蒼昊憶公誕降未離襁褓兩母提攜互相保抱弱冠從戎英騰獨早虎略龍韜潛心研討望重北洋一切包埽迭握軍符見推當道懷遵母訓明發篤孝世變滄桑怒焉如擣山巔水湄心甘枯槁知幾其神如龍天矯歸潔其身我大物小幾歷泯焚幾經僮擾愛國愛鄉保全不少萬衆公

推曾來纏繞堅臥不起洞燭幽杳不輕一擲非圖自了氣靜神恬
年高德劭慮遠思深輕心不掉故宮之役垂青不肖推心委託毫
無束約因公趨謁時接色笑水乳交融兩心相照政變又生先時
知覺曰歸曰歸始啖道貌聞公保安金湯無撓功德無量輿情舞
蹈曩值賤辰承公飾藻賦以佳章別具雅操綜公生平孝思克紹
雙節堂高無違闡教忠清亮直平矜釋躁口無言擇腰有骨傲每
念國恩慚無補報磊落光明事無咎懊夷惠追蹤禔躬慥慥夙荷
深知懇摯周到驚聞騎鯨中心是悼未謁靈筵謹茲文告我公之
靈鑒茲蘩芼尙享

李忠節公奏議跋

庚午

金鑑年十七讀書村東曹官寺從曹子鐸先生

振聲

遊一日先生

論本省人才謂董達川太史

執

有言奉人官中外者以岫巖李鑑

堂獨出冠時其勳績風節必爲不朽人物後十年金鑑館於省垣

適公來奉查辦仁育兩軍案以行營總理雷鈞衡置諸法人心震

駭草木皆驚論者比於宋之包孝肅明之海剛峰其威望之懾人

至於如此洎金鑑在清史館極意搜求公之傳略並於翟熙人省

長

文選

處得奏議數十冊又設位於東三省會館之鄉賢祠今清

史稿既有公傳復檢奏稿刪其無關係者存若干篇付印以廣其

傳讀之可見公之體國公忠關心民瘼躍然如在紙上嗚呼是可

傳矣論公者於庚子一役每有微詞實則公之以身衛國知有忠

而已以身殉國知有節而已人臣若此可以不朽尤堪媲美古人
炳耀乾坤豈徒增光鄉里已哉金鑑未獲見公之顏色而仰止之
思積四十餘年茲以校讐奏稿謹抒所見著於篇末而爲之跋

李子棟瑄珩琪館詩序

庚午

陶靖節五柳先生傳有云閒靜少言不慕榮利又曰常著文章自
娛頗示己志吾於北鎮李君子棟見之君秉醫閭之秀幼而穎異
年十七小試冠軍甫踰弱冠聯捷成進士聽鼓天津受知昆明朱
經田中丞徐東海督東調回本省民國六年余長祕書君由二十
八師調轉入幕昕夕聚首見君沈潛靜默終日無一言而文學淵
博根柢盤深偶出所作得未曾有蓋其視塵俗事均無足介意惟

窮年兀兀溺志於學凡所過目不復忘宜其所業之精純舉無能望其項背也君著作甚夥雅不欲示人余以君少年科第而不刊鄉會硃卷勸其錄出付印君又究心算數偶一披露今歲出所著瑄玕琪館詩屬余一言君詩浸淫釀郁華實並茂格律雅近溫李而意境深醇餘味曲包不使人一覽而盡信必傳之作也余每勸君盡出所著勿自韜晦君允次第印行此冊不過其十之一二耳尼山有言默足以容又嘗以南容三復白圭特許其賢余素鮮金人之戒每佩君之言不輕發幾幾至於不發謂可免於今世堪爲好持議論者之師資矣至詩文著作蘊藉含蓄不露聲光雖傾篋出之悉以問世不致貽失言之悔也因序君詩故推論及之

方舟山人傳

辛未

君姓張氏諱之漢字仙舫方舟山人其別號也所居曰石琴廬又號琴廬主工六法署款遼海畫禪先世爲北平巨族曾祖文振公出關居廣寧再傳至聲遠公宏才傑出志略過人弱冠東來營商於奉天省南十里河鎮累資鉅萬遂占承德籍生子二長芷蘇少尹諱之赫聰穎能文精醫術君其季也生有宿慧襁褓中眈視壁間圖畫若解其意冬月抱瞰玻璃窗就霜暈伸指畫花鳥皆肖見者驚異初學步庭院間輒坐拂地上浮土畫山水百卉再拂再畫恆至移晷久之患疾醫診謂由土溼宜禁坐地病愈技癢復坐畫如前聲遠公慨然曰此子前身必畫師也禁之不得乃授之紙筆

並誠之曰畫則以此是爲君執筆作畫之始君食左執筆畫亦左
執筆書則左筆而右旋日惟蚩蚩弄墨不與他兒伍七齡入家塾
習字仍左執筆師訶正之乃勉用右然伺間仍易左自是書則兩
手輪替畫惟左筆弗能易也十三齡聲遠公棄養君兄弟方讀書
均不諳家人生產司商肆者非人折閱侵耗頽波難挽君知先業
必不可保乃益淬志讀書數年果不支不得已棄書歸里百孔千
瘡債臺層積罄產不足以償風霜磨厲自此始矣君旣無以爲家
而慈親在堂又不得遂志四方乃資舌耕以養兼以自勵時左軍
門冠廷得歐西各國旗陣圖欲繪副本未得其人幕府陳笙伯先
生耳君名介尙君鼎三相浼畫成軍門大喜酬以金弗受笙伯先

生乃索君文藝批正之亦不受贄先生爲制藝宗工君又虛心問業學乃大進旋入郡庠食廩餼文名藉甚洎遊幕省垣與當時名流相切劘益留心經世之學中東戰後時局日危君心焉憂之爰本遼人守遼土之意創三衛法著遼東守備策二千餘言當軸傳觀同聲激賞庚子約成俄不退兵盜匪充斥又著時勢平議弭盜策等篇兵部薩簡齋侍郎廉見而善之命其二子執贄問業君旣慨世憂時不獲一試輒以其磅礴鬱積之氣發爲詩歌溢爲山水花鳥時人得寸牋尺幅爭相寶貴然不以詞人墨客目君也泰安趙次山制軍初次督東以盜氛未靖銳行警政就地籌餉頗起民訛紛紛來轅請罷制軍以君熟悉民情委充鄉鎮巡警總局顧問

官至是特召垂詢君曰民請罷警爲警不足以制盜也因設警而抽餉未除盜患又增餉累是兩困也專責警以制盜旣背警章徒滋盜蔓是兩失也乃籌擬靖盜大綱以布軍防嚴執法密警察三者爲協濟之策條分縷析凡數千言議上制軍手批嘉獎立飭有司施行會制軍調兩湖議遂中寢僅另陳釐定警章減輕地餉十分之六一案飭行在先見諸實行民力以紓君之爲文也抗心高寄不摩時趨兩試秋闈不第即值世變凡桑梓安危地方休戚無不縈結於心制舉之業不復措意宣統紀元被舉孝廉方正旋以優行貢成均朝考例得授官分省君以鄉邦多故不欲聽鼓異地遂請假東旋仍役役於地方之務是冬充奉天防疫公會副總董

與官府劃分防限商民疫戶由會檢察保全甚衆初奉天開辦十

屬自治由民政司籌辦君與金鎧暨海城王廉溪

玉泉

鐵嶺劉鏡

湖

東煇

同膺顧問之聘及諮議局選舉復應聘爲顧問尋被選爲

諮議局候補議員奉天三次請開國會書均出君手辛亥季秋諮

議局開第三次常會君補列正席持議諤諤不徇衆唯阿未幾武

昌事起奉省危機四伏影響金融陡起惶恐地方諸君急起謀保

安君與孫鼎臣太史

百斛

慮金融不穩則大局立壞乃聯合商會

壹力維持錢法卒能扶危定傾延全省命脈於絕續之交太史之

功偉矣君亦與有力焉維時客籍諸官多委職去公令幾於停擱

君乃入佐制府文書身兼數職案無留牘並兼任東三省官銀號

總稽察於金融復多贊畫是冬以卽用直隸州知州奏保得請君體素清癯而昕夕趨公簿書填委不見疲倦之色暇輒以詩畫自娛至如評花賭酒樗蒲彈棋時人所謂娛樂之具一無所嗜其素性然也然逢場酬應亦油油與偕不爲矯同戾俗之行奉天官地清丈局創始於民國三年至是委君接管屯墾總局亦歸兼辦田制複雜如理棼絲而糾葛癥結尤以王公莊地爲最丁佃狃於習慣往往拒丈抗官令出惟行責言斯起君曰夫政只問其宜民否耳清丈莊地之舉爲佃民定產權爲國家一田賦非苛政也且佃民受王莊之束縛二百餘年矣欲易王產爲民田在帝制時雖傾萬貫叩九閭奔走呼籲百求而不可一得者也今以時勢之殊政

令之行剷斷府權完成民產此佃丁百世之利然則今日抗命之人即他日感惠之人可斷言矣果不數年地價翔踊凡承領莊地者利皆數倍竟如君言孫贊堯督軍建節龍沙調君往辦財政因卸兩局職務未成行而病作嗣因皖直之役奉軍入關奉檄督辦東三省銀行殫精創始剋期觀成百感撻心一病幾殆自揆精力不任繁劇三辭始獲解職安心息養經歲復元當軸以君諳練政治畀以諮議壬戌奉直交綏出襄後防機要事解後仍杜門不出種柳讀書有終焉之志越歲署理實業廳長實事求是績以大著戊辰八月署東三省鹽運使鹽款爲本省入款大宗君嚴杜外私無弊而有法歲入增加三年報最辛未八月十八日卒於營口官

癯年六十有六遐邇聞者莫不痛惜君外和內介不可以非禮干於學無不窺而慮事精詳思致周匝鉅細弗遺記曰文理密察足以有別君足以當之矣君天資既高而學復足以濟之詩以清思盤結務得真情實境不規摹擬塗澤畫不名一家於宋元以來宗派源流考究甚悉故涉筆神與古會然不欲以此自名故詞墨之流布極鮮并以餘力研究金石篆刻究心醫術著有石琴廬詩集石琴廬叢刊行世君應優貢朝考時在京寓慈慧寺與達通和尚相契和尚有道行圓寂後君以事赴京出資爲之築塔刻石以永其傳又同里侯鼎有至性事母孝貧窘無以爲生君發起募金俾養瞽母並爲文記其孝行皆君行事之可傳者也金鎧與君總

角訂交迄今四十五年矣君勸善規過友而兼師以故君最知我
我亦能道君之生平孔子謂君子疾沒世而名不稱如君之卓然
自立復以詩畫名家可謂存順歿寧無忝所生者矣爰爲之傳備
史家採擇焉

論曰昔孔子思狂狷之徒魯論列四科之選人才之難古今同慨
君少歷憂患卒自振拔謹言慎行有所不爲所謂狷者非耶優於
幹濟詞采斐然則又兼政事文學之長矣衛詩曰如金如錫如圭
璧大雅曰惟此文王小心翼翼可爲君誦之

張仙舫像贊

辛未

我年十七僧廊識面

君嘗贈詩云嶽嶽寒松挺秀姿論交早結歲
寒知同遊事事都難忘最憶僧廊識面時

四十五稔交情縈縈德業交勛陶淑冶鍊友實兼師攻錯靡倦戒
我闕疏亦邀稱羨君許我狂我許君狷圭璧持躬不爲不善翼翼
小心始終弗變政事文學三絕兼擅自是傳人豈曰露電仙乎仙
乎風標如見

祭張仙舫文

辛未

維中華民國二十年九月二十一日袁金鎧謹以清酌庶羞粢盛
牲牢之品致祭於吾友張君仙舫之靈而告之以文曰嗚呼舫兄
古稀猶靳遽返蓬瀛其不必計較者修短之氣數而最難忘者夙
昔之交情吾年十七初求友生識君蕭寺歡愜班荆長我四歲金
蘭訂盟我時就學君已舌耕講求文藝互有批評逮己丑之小試

獲追隨於芹鬢秋闈兩度偕賡鹿萃值庚子之拳禍停科舉於兩
京我時呂邨設帳邀君來伴孤檠恰崇館之轉薦君乃去鄉而入
城地方椒擾萑苻縱橫我擒盜首肝膽雷鳴豪俠自喜路掃不平
君時戒我勿涉自輕輕則寡謀行將自傾嗣辦團警遼瀋連并緝
匪籌餉大府知名君又相勸勿大色聲人將伺我妬忌所萌果如
君料控訴來撻迨長議席浪息波鯨辛亥政變草木皆兵泰安是
佐竭智殫貞君亦夾輔幣制經營羣策羣力相與有成我膺卿秩
君亦銜更比臨溟之秉政司清丈而持衡我辭祕長龍沙帆撐旋
即舍去路躡雲程君又羨我謂能蕭然物外而不粘不脫更合於
保身之無盲每慮過厚渾而不精恐妨任重恆以爲爭迨總理史

稿之艱鉅責無旁貸則又謂審於緩急輕重寓渾厚於精明貞非
絕俗不慕虛榮許我浩然磊落崢嶸蓋嘗弗懈於勸善規過勵我
以斯邁而斯征君詩精細露爽英英樹幟畫苑滌筆冰清篆刻醫
術技妙人驚我則自抒胸臆空所倚傍君亦許以獨來獨往若松
蓋之孤擎嗚呼我狂君狷相拒相迎如五味之相調如剛柔之相
劑如異采之互呈如斯友道攻錯益瑩庶幾近古不墮冥行今君
長已矣蓋棺論定棋局結枰文學政績卓犖鏗鉉即降格以論亦
庸中之矯矯鐵中之錚錚我猶後死世變鬪爭戰兢自惕寸心忤
忤望君啓牖勿陷沸羹憶過君舍置酒前楹傾懷談讌綠橘黃橙
今陳奠饋潔我粢盛雲旂下降響佩琤琤樂具入奏鼓瑟吹笙有

肴如玉有釀如瓊洋洋如在鑒我微誠尙享

重刊常理齋觀察殉節錄序

辛未

法庫常理齋先生節義風雅世所僅見而吾鄉人蓋鮮有知之者

亦歲月曠遠書籍缺載之所致也通遼汪縣長景度

激波

與常氏

有感誼客冬過談始悉梗概亟欲搜訪遺跡以傳其人嗣先生裔

孫常君錫三

恩緒

出示先生之愛吟草殉節錄暨吾邑王瑤峰先

生撰書諸序海內名賢題詞褒忠揚節詠歎欽崇墨寶高文琳琅
滿目蓋皆當日瑤峰先生所徵求者洵足寶也昌黎韓氏有言莫
爲之前雖美弗彰莫爲之後雖盛弗傳先生之忠節固卓卓可傳
亦賴發皇盛烈與人爲善者之有其人也通志館長白君佩珩喜

表章先哲籌商付印以廣其傳並爲立傳於通志從此百世聞風
頑廉懦立而先生可以不朽矣至其在官政績殉節始末備載錄
中故不贅敘

備廬文存卷之三

備廬文存卷之四

遼陽袁金鎧潔珊

陳挺生愛廬印集序

壬申

古之工書法者類能刻畫金石以自鐫寫唐李北海寫碑刻者爲黃鶴山樵或謂即北海所自爲也刻石之學與篆書通吾友金州李東園瀋陽王希哲均工篆書並善刻石其篆書日進其刻石亦愈進焉昨聞侯陳君挺生以愛廬印集見示蒼老樸秀曼曼獨造不懈而及於古於東園希哲外得君而三矣君本工書故奏刀如用筆而襟懷超逸抱負瑰奇均流露於字裏行間有蕭然出塵之致學與年進所造詎有涯歟四方多難蹙蹙靡所騁若藉藝以傳

亦難能而可貴者勿謂篆刻爲小道也

遼陽韋君墓誌銘

壬申

君姓韋氏諱清選字進升其先昌黎人也清康熙時遷遼陽之古城子村自君曾祖以下皆單傳至君幼失怙恃能自振拔居恆以光大門庭爲志弱冠出賈於外所至爲人倚重已而旋里庚子拳亂土匪蠡起君被推出辦鄉團築堡備械布置井井復與鄰村營聯防匪人斂迹不敢犯遼陽西北練勇之名於以大著大府獎以五品軍功甲辰日俄之役君所居村適在戰區嘗以衛庇村民出而折衝觸軍官怒羈致軍中父老環請甚力軍官恐激衆憤始釋歸時各村均有駐軍獨君村無恙會俄軍破防南犯村民惶遽無

主君持以鎮靜一一爲之區處不遑寧家迨情勢迫切始走避而家資因以蕩然矣亂後歸來復籌警所創學校種樹修路濬水築梁諸事并舉不遺餘力迨已就緒乃推村耆之謹慎者分董其事蓋至是以一身繫一鄉之安危者已八年矣君旣積勞瘁又疊經憂患浸致疾病以某年九月十六日卒於省寓年若干歲配王宜人歿於光緒乙巳年除夕繼配孫宜人亦先君卒子一煥章王宜人出有聲於時累官奉天教育廳長煥章以葬親有日來乞銘余維君仁孝敦宗族信義著里黨且能不恤其家保衛桑梓古稱鄉先生歿可祀於社者允足以當之矣不僅獲有賢嗣之報爲足稱也乃爲之銘曰

世人汲汲謀其私急公好義罕見之君獨愛鄉力維持熱誠感衆
衆不疑天鑒其衷予賢兒光大門祚繁本支惟天獎善無參差謂
予不信視此辭

陳慈首孝廉誄辭

壬申

嗚呼慈首倏棄凡塵警欬頓隔大雅沈淪溯君家世來歸自閩迨
君伯祖忠節嶙峋科名政績爲國名臣巍巍祠宇大啓爾陳鶴溪
嗣響家寶國珍中途稅駕未展困輪屈君三葉書香猶新秋風攀
桂典荷興賓江南作宰撫字宜民酷嗜墳典網羅漢秦考訂詳審
甘飴茹辛積成卷軸著作等身每披志稿炳炳麟粉榆掌故訪
輯頻頻抗懷登善下筆有神氣味韻絕秀采敷春趙山木外再見

斯人氣骨尙健笑語時親偶染微恙未露吟呻玉樓遽召劍化延
津斯文頓喪甫及六旬蒼涼神樹蛻脫清晨超世高舉悼及其鄰
君遠世故文質則彬雖曾仕宦依舊清貧文章墨寶價重璆璘吾
鄉傑出疇接傳薪流風餘韻寄慨靡垠爲撰斯誄以存其眞

祭于雲章文

壬申

嗚呼雲章遽返仙鄉四日以前見君病牀機雖稍轉私心恐惶以
宿恙已久非伊朝夕孰能力起夫膏肓然死者人之所必不免苟
作達觀亦寒暑晝夜之尋常惟素昔交遊之久關係之深每一回
首不能不黯然而神傷始君負笈遊學東洋甲辰之役乃返遼陽
以軍中之成績爲外邦所稱揚余時辦警東北團防需才孔亟作

我壁牆薦於趙督君始處囊此時與君猶未識面然已聲應氣求而默契於中藏辛亥之歲調查政治引君匡襄君赴洮郡結納於張迨政變之條起立會相助爲理則又薦君掌辦外交事務而汲汲以黽皇最後明保敷奏殿廊君升道職我忝京堂迨州牧之攝署復政績之孔彰交涉司使玉帛增光銀號總辦不兌現鎊兩番哈埠交涉頗強惜所施未竟病已恆懷自是遂俯仰林麓優游園榭而棲息於別莊君才卓犖彊識不忘語言之學論者莫當精於書法翰墨留芳應變鎮物別具智腸意中實少所許可而獨阿好於不佞至以門下小使自抑而隱示其表坊望衡對宇朝夕相望論事則窮源竟委論人則知短取長論修爲則深明因果論未來

則據理否臧君皆筆諸日記歷歷以待其驗而不忽其毫芒藩變
以後指示有方供我採取劑以柔剛蓋以交誼而論可謂始終無
間歷二十八年之久未嘗有意見之參商嗚呼追維往事幾度滄
桑人天永訣泉路茫茫邦國殄瘁人之云亡與誰互證策畫子房
人琴感喟騎鯨不返安能禁夫雪涕之浪浪謹陳奠饋潔進壺觴
佐以時物橘綠橙黃以享以祭明德馨香風車雲馬陟降在旁

吳雨生先生贊

癸酉

癸酉正月吳向之總纂以自訂景杜堂年譜見示首載先德雨生
公事略公以孝廉起家歷官山右署靈石補臨汾內外服闋兩補
榆次署廣靈進直隸州知州時值捻回紛擾集餉供軍公顧念要

需弗愆晷刻而民不以爲病又爲民去瓜貢累力爭渠利所治士
子有德藝者優禮弗倦皆其政績之卓卓者夙性孝謹嘗以讀書
植品勛其後人謹擬贊辭以抒景仰其辭曰

猗歟吳公誕降吳地起家孝廉牛刀小試初宰靈石頌德樹碑荷
獎補官誰曰不宜內外服闋兩補榆次旣念軍需恤民尤摯環視
境內瓜貢累民上之大府俾減吟呻太谷南席來爭渠利公力持
之有忤弗忌天性孝謹學道愛人讀書植品垂訓諄諄積累旣深
篤生哲嗣彊識博聞品純學粹等身著述不朽盛名靈爽在天赫
赫明明

過西八里莊祭李祝三墓文

癸酉

歲月彈指懷我祝三便道謁墓肴酒是擔君才不世吾遼奇男文
壇飛將細入大含吐棄凡近冥索幽探性情敦篤材鬱梗柑即享
中壽著作誰堪亦足不朽名冠朔南彼昔賢之傳世亦資算於彭
聃胡顏淵之短命竟半途而停驂昔印遺稿警闕沈酣見者咋舌
把誦爭耽尙期搜輯裝成巨函俾垂於後傳作何慙應修文於地
下比一現之花曇憶當年之促膝曾妙理之互參傍青鐙與黃卷
或斗酒而雙柑如飲醇醪其味醴醴我來不見莫接清譚墓木已
拱山贖晴嵐慨斯人之長逝悵桃花之深潭

陳季芳先生葛溪詩鈔序

癸酉

吾鄉詩學在昔咸同間以劉仙樵大令爲最著渾灝流轉才氣縱

橫允稱作者余在清史館爲入文苑傳并將其詩集錄入藝文志以永其傳誠不愧也當時與大令唱和者有馬西岡老人及劉青門布衣馬以奧衍勝劉以雋永勝均能憂憂獨造不染凡塵其得仙樵之沾丐者深矣葛溪陳季芳先生於仙樵西岡爲後輩其於詩學之研究不似青門布衣之劬苦而以工於制藝負士林盛名後以優行貢成均秉鐸平山於其旋里時余猶及見之生平著述有女兒古鑑諸書茲復得其詩稿讀之清而不腐雅韻欲流能將性情學問曲曲傳出詩雖不多亦吉光片羽之可珍也今吾鄉老輩彫零盡矣安得重振詩學以繼仙樵諸公之盛爲吾邑山川生色此後起者之責也因序季芳先生詩而感慨係之

蘇君蒼岑壽序 癸酉

世之爲壽言者夥矣知之不真則其詞多泛譽之溢量則其義已浮均非所以昭實錄著信史也余生平不喜爲人撰壽序偶有所作亦必按切事實蓋素性然也矧道兼師友誼關骨肉恩同昆季學究身心相與至四十年無一事不相聯注無一時不通消息相知之深相處之久督過獎善竭誠盡量如吾與蒼岑者乎癸酉重陽第三日爲君周甲攬揆之辰君凡事不欲鋪張稱觴祝嘏非其所樂然不可不爲文以紀或以垂家乘傳久遠是亦極有關係之事也君爲外舅西園先生長子母王太孺人幼秉庭訓一虔於禮余年弱冠君姊利貞來歸余以昏姻常謁岳翁飲聞雅論君少余

四齡質沈毅如成人與余有狂狷別箴余過失期許至厚余薦高
華廷直刺李訥夫廩生張石琴都轉爲館師君從受業獲益甚深
光緒乙未余丁內艱設帳里門君負笈來遊不肯習帖括學日諷
讀儒先性理書及詩古文辭以寄興抗心希古別有所會余病闕
疏而君則心思邃密守程朱學嚴非禮之防余甚敬畏之嗣經憂
患撓訟累辦警團雖心迹昭然不以得失譽毀繫念然醇駁互見
不及檢點而歉存養省察者多矣賴君不棄時相繩糾四十年來
積久不懈尤可感也君有用世才而不事進取卽爲地方公益善
舉亦卽其實而避其名日理家務井井有條門內食指逾百皆雍
睦無異言幼秉家學明發有懷身體力行內行敦篤施政於家風

動里黨兩居親喪守禮不渝猶復手不釋卷孳孳力學德信於人無惡無射孔子論士曰行己有恥言信行果又曰宗族稱孝鄉黨稱弟君實有焉可謂得士之眞詣允副志潔行芳之實者矣昔魏環溪先生之入仕也慮京居祿用不足其妻兄李恆嶽慨然曰君能行道於天下凡有所需吾任之不使有內顧憂魏公爲世名臣清操絕塵仁廟嘗書寒松堂額以賜天下重魏公並稱李先生著爲美譚余家析箸後無一隴之殖一瓦之覆內子攜子女賃屋君屯鋤園課耕猶慮不給資君營度賴以餬口洎余徙寓省垣薄有所積家事漸繁君殫慮畢力代爲經理鉅細靡遺籌畫甚至謀人之忠逾於謀己今日吾家獲有溫飽子孫如能善守可免凍餒之

虞皆君力也余不及環溪先生之所建樹而君之助余理家常使
有餘實比李君之於環溪矣余既資君講學之益理產之勞兩事
皆關生平之大不可不紀君以余績學作事服務桑梓尙未隕越
不無恕辭然余終以闕疏之弊猶未盡祛內自愧赧不足副君之
期待仍冀常賜鍼砭以匡不逮更願君由周甲而古稀而期頤不
惟常作坊表於一家一鄉一邑余亦永資獎善救失之益於以保
全晚節不致鮮克有終豈不幸歟

續龍文鞭影序

癸酉

續龍文鞭影一書復縣葛樵溪先生

秦源 原名人龍 咸豐間恩貢
生 同治紀元舉孝廉方正

所著也先生學問淵博工詩古文辭不僅以帖括見長曾主遼陽

襄平書院講席光緒癸巳金鑑將應順天鄉試由省垣回里考賓
興適值書院齋課亦與試焉荷先生首獎爾時行色怱怱深以未
及拜謁爲憾近年網羅東北文獻意先生必有著述乃囑董蘊珊
大令統基訪諸其家得續龍文鞭影四卷乃先生就廣輿記事類
統編兩書鎔鑄而成造語精警對仗工練尤能推崇名節景慕賢
豪具牖世覺人深意蓋以發潛闡幽爲職志者也爰爲校定付印
以廣流傳間附批語藉引起讀者注意先生以老儒沒世家境窘
迫子孫有凍餒之虞不爲表章將歸湮沒且恐此編以無人愛惜
之故亦遂埋沒故紙堆中與灰塵同腐豈不孤作者之苦心耶此
又金鑑刊刻此編之微旨也縣志稱先生著作宏富其他詩文著

作當有存者並囑其子廣爲搜輯更續刊以問世庶慰先生於冥
漠中乎

重印仙樵詩鈔弁言

癸酉

劉君偉華

榮甫

持重印吾邑劉公仙樵詩鈔四卷見示屬爲弁言

余知槧本向在馬西岡先生家往年晤其文孫相臬請出藏板重
印以廣其傳人事忽忽未卽舉辦今劉君毅然爲之並爲補訂勇
於爲善是可敬也詩鈔刻於同治庚午卽爲余生之年迄今六十
四載矣當時所印無多得之殊不易易余弱冠後曾獲見其印本
然未能窺其深也近年搜求鄉邦文獻取李廌青戴遂堂陳石閭
馬大鉢諸家之詩讀之固皆卓然名家非獨我奉天一省之光也

劉公詩境異於李戴陳馬諸老而天才濬發俯仰吟嘯暢所欲言
無格格不吐之病於張船山一派爲近洵不媿風雅正宗足爲諸
老後勁讀其詩者當自得之非余一人之私言也余總理發刊清
史稿時曾爲公立傳於文苑並附詩鈔於藝文志此可以致君於
不朽矣吾鄉學子能奉公爲師資正其途徑不至誤入歧趨庶風
雅之繼續有人則劉君重印之功將亦與之俱永豈不懿歟
重印西岡詩草弁言 癸酉
吾鄉馬西岡先生負有重名余生也晚未獲接其警歛而於哲嗣
銘侯 樂溥 文孫相皋 僖銘 則甚相得也聞人談及先生咸謂落落
有奇氣及讀其詩則又開徑獨行空所依傍一如其人信爲一世

作者先生生平篤於友誼曾刻仙樵詩鈔暨西岡三友詩板藏於家自作之詩雖不甚多亦并鏤版行世惟外間流傳絕少今者劉君偉華既取仙樵詩鈔之舊版重爲印行復取先生之詩版亦印行焉余嘗謂能傳人者人亦傳之先生能刻友人之詩以傳於後後必復有印先生之詩以傳之者感召之理固不爽也而劉君之功於是不可沒矣

安君波岑墓表

癸酉

君余之畏友也諱如磐字波岑盛京漢軍正白旗人先世有諱士雄者自義縣遷於遼陽城北安三家子曾祖諱居妣氏鄧祖諱國才妣氏王父諱明母氏宋氏丁君少余一歲光緒戊子君家延曾

子鐸先生課讀余年十九往附學與君同硯者三載君姿性聰穎
讀書過目不忘顧不喜帖括好讀史鑑落落有奇氣君之仲兄古
岑同里陳君子升先後游泮人以爲榮君視之泊如也庚子拳亂
邨人饑饉君恐流爲盜匪出所穫糧以濟之其後變亂彌甚君家
被劫十餘次長兄海瀾爲宛家台股匪掠脅驚悸而逝君大奮起
而勦練鄉團復請督標營隊駐於鄰屯乘隙爲兄復仇獲正匪三
皆置於法餘釋不問而地方賴以乂安甲辰日俄之役余立巡警
局於呂方寺邀君幫辦值余以事他出君輒認真緝捕實行職責
用是得無廢事嗣主辦東山堡分局亦能其職丙午巡警改歸官
辦君任主計余處事寬緩君規戒不遺餘力熱腸苦口始終如一

生平見義勇爲每爲鄉里宗族排難解紛捍患禦侮其事不可悉舉所尤難者從弟恩霖夫婦相繼病歿遺老母孤兒無人事畜君以責無旁貸乃攜眷就與同居代肩養葬之任撫幼子俾至成立而後已遼陽創辦自治君則究心於是民國後入官地清丈局於正經界奠產權諸務用力尤劬戊午君以疾歿於省寓疾革時諸子環問大人與袁公爲總角交氣誼最孚當不能無言君惟誦人生自古誰無死之句竟無他語含笑而逝享年四十有八君生平肝膽照人緩急可恃不惟得失毀譽無所繫念并生死亦不介於懷可謂大澈大悟者矣余所以引爲畏友也配吳氏生三子集義集雲集桐皆能黽勉自立有聲於時人謂熱腸人應有賢子孫諒

哉君葬已久集義等請余撰文表於墓道誼不可辭爰櫟括其生平紀之於右自信無一謬語亦以重吾畏友也

先考敬廷府君墓表

癸酉

嗚呼世有足不出家庭鄉里之間而純德殊行終身如一雖其子孫力自振拔欲有所繼述而終莫能肖者乃於吾顯考敬廷府君見之府君居嘗詔諸子而告之曰吾家於國初居城西八里莊三世伯祖洪亮以禮部六品官遷省垣子珠亦以七品官顯是別爲一支吾三世祖洪選遷北園太高祖登科遷城北五十里山藥堡綿延以迄於今同里徐公國相於康熙時以大司馬官湖廣總督著有政績其子岳官閩中知縣侯公元勳於乾隆時以舉人令於

南陽而吾家惟力農自給無以讀書博科名者顧蓋藏亦不豐至爾王父家漸充裕以艱於子擇兄子和爲嗣時方七歲次年始生余余十一歲就外傳讀三載聞塾師講解無弗了了以限於世業不能久讀改業農至今猶以爲憾幼年體羸自刻勵不少惰年十七娶爾先母王凡瑣屑之務無不理勞苦之役無不親計自同治六年析居十數年中余未嘗一共客飲蓋家人食指甚繁余雖艱鉅獨當而於處昆季中不敢忘悌讓也爾先母卒無所出二十四歲爾母楊來歸溫恭淑慎爲坤道中所僅見余旣得內助之賢益肆力於農業講求不倦久而久之覺其事自粗而精含有妙理彼終身號爲農人而終身爲門外漢者何比比也大凡愉快趣味皆

自辛苦得來余每日從事隴畝外卽致力於園圃朝殖一葱夕藝
一韭栽培灌溉歲以爲常掇而食之芳香滿口驗他所有率不吾
若他如田家所需或繩或席余手親製經久不敝我家門房及東
廂并東院之東廂皆余經手所興築嘗涉書史觀其大意於聖賢
豪傑之行事輒心嚮往之余治家尙儉居常不肉食而爲戚友設
饌則不肯從菲夫居恆不可不省待客不可不豐理固然也族姪
金滿之妹幼失怙恃鞠養於家長遣之嫁族兄禮老而鰥無所歸
養於余家者八年渠有冊地三繩欲因以遺余余弗敢留余夥居
時曾充里正兩次共二年撥派官錢每日地三百五十文或四百
文曾讓西院門前官道一條光緒六年與五里台張公福全興修

里中石橋募資竣事又讓溝南官道一條勒諸碑嘗御車於省北
小橋觸三官廟尙姓車夫盧某因傷致死余肇此意外神氣如常
逆旅主人甚驚異私詢從人袁某曾經歷何等大事而鎮定乃爾
其實余處世間事無不如此也生平黎明即起以吐納天地清氣
兒女幼稚未嘗提抱與人不嬉戲處事接物惟秉公理衾影中無
所愧怍雖至親至邇之人於其不是處見之彌真人或以是病吾
刻然此心如明鏡妍媸畢照雖欲稍蒙混而不能也每見聰穎學
童以家貧廢學輒引以爲憾而別寄遐思又每以遠近通才名士
一入吾門爲最光寵鎧兒讀書有所成就吾心頗慰然吾聞世有
不讀書之賢豪有讀書之敗類遺臭流芳宜自審也最怪今時政

治講維新言變法吾謂勤儉二字乃治天下國家之要道若徒摹
形式耗金錢而曰能富強恐無是理府君持論如此行事亦如此
而猶若不足以盡之嗚呼純德殊行終身如一微論後人莫克振
拔有忝厥先卽令不自菲薄殫心力以赴之其於府君生平果能
彷彿萬一而有以發潛德之幽光乎噫亦知其難矣府君諱穆字
敬廷祖諱英妣氏崔考諱文秀妣氏殷生於道光丁亥十二月二
十一日丑時卒於光緒三十三年十一月二十八日申時壽八十
有一從星家言以道光戊子起算故又云年八十序居六隸盛京
禮部正黃旗三子長金銘先卒次金鏞三陵衙門六品官次金鏗
歲貢候選訓導遇缺卽補知縣四品京堂簡任奉天財政司長特

任奉天省長皆未就清史館總理參議府參議女一金蘭幼殤孫
男慶溥國子生慶潤鹽務監督署緝私局長慶濂濱江稅務監督
署署長慶濟熱河林西縣公安局長慶清北京大學畢業吉林舒
蘭縣縣長參議府祕書慶澤保定軍官學校畢業濱江路警第四
區區長慶鴻濱江法政大學畢業東路稽核局稽核員慶溥幼讀
以卒年十二月十六日葬於北原祖阡閱二十六年子金鎧謹序
次府君言行梗概書爲墓表以揭於阡

袁氏三貞女碑記

甲戌

瀋陽南十里河驛承袁國陞妻吳生女鶯蘭繼室王生女玉榮國
陞以鶯蘭字某富室女不欲也顧懼梗父命使玉榮婉陳其意國

陞不聽並語侵玉榮是夕二女皆自經死時鶯蘭年二十九玉榮年十九葬於河南村東南里許小山之南麓二塚相連逐年而高人咸異之國陞又有二子一女女名玉艾兩姊歿時方三齡及笄請於父母願事親終身矢不嫁以從兩姊之志否則有死而已父母懼蹈前轍從之乃析其產爲三以其二與二子別爨以其一與女女遂奉父母以居父歿瑩兆未卜停柩於室者六年母歿亦如之每日焚香供食一如生時歲甲辰日俄搆兵始厝二柩於後圃室惟一女而已民國十六年春三月女年八十無疾而逝其家爲葬於兩姊之側以成其志三塚並峙如筆架然其姪孫錫庚爲述其事余聞而嘉之題曰袁氏三貞女墓立碣而系之以辭

不降其志不辱其身二女有焉皎皎絕塵撒其環瑱如嬰兒子有
齊季女貫厥終始於戲三女志行吾宗之光俯視一切天際鸞凰
虎皮驛南河流有涘馬鬣崇封鼎立並峙貞石刊辭傳諸羣口彤
管流芳可垂不朽

備廬文存卷之四